



舊五代史卷三十七

宋門下侍郎參知政事監修國史薛居正等撰

唐書第十三

明宗紀三

天成元年秋八月乙酉朔日有食之有司上言莊宗廟
室酌獻請奏武成之舞從之鄆州節度使霍彥威移鎮
青州丁亥莊宗神主祔廟有司請祧懿祖室從之詔陵
州合州長流百姓豆盧革韋說等可竝自長流後縱逢
恩赦不在原宥之限豆盧昇韋濤仍削除自前所受官
秩壬辰以久雨放百僚朝參詔天下疏理繫囚甲午汴

州奏舊管曹州乞卻歸當道從之是日詔曰承前使府奏請判官率皆隨府除移停罷近年流例有異前規使府雖已除移判官元安舊職起今後若是朝廷除授者卽不計使府除移如是使府奏請卽皆隨府移罷舊例藩侯帶平章事者所奏請判官殿中已上許奏緋中丞已上許奏紫今不帶平章事亦許同帶平章事例處分如防禦團練使奏請判官員外郎已下不在奏緋之限其所奏判官州縣官竝須將歷任告身隨奏至京如未有官假稱試攝亦奏狀內分明署出如藩鎮留後權知軍州事竝不在奏請判官之限如刺史安奏州縣官須

申本道請發表章不得自奏近日州使奏請從事本無官緒妄結虛銜不計職位高卑多是請兼朱紫不惟紊亂實啓撓求宜令諸道州府切準敕命處分丁酉內出象笏三十四面賜百官之無笏者己亥帝御文明殿百官入閣月朧如月朔之儀從新例也荆南高季興上言峽內三州請朝廷不除刺史幽州奏契丹寇邊詔齊州防禦使安審通率師禦之辛丑以前青州節度使符習爲鄆州節度使以前華州節度使史敬鎔爲安州節度使乙巳禁鎔錢爲器仍估定生銅器價斤二百熟銅器斤四百如違省價買賣者以盜鑄錢論丁未樞密使院

條奏諸道節度使刺史內有不守詔條公行科斂須行
止絕州使所納軍糧不得更邀加耗節度使刺史所置
牙隊許于軍都內抽取便給省司衣糧況人數已多訪
問尙有招致諸邑人多有抵罪亡命便于州府投名爲
使下元隨邀求職務凌壓平人及有力戶人于諸處行
賂希求事務亦有州使妄稱修葺城池解宇科賦于人
及營私宅諸縣鎮所受州使文符如涉科斂人戶不得
稟受州府不得賒買行人物色兼行科率已前條件州
使如敢犯違許人陳告勘詰不虛量行獎賞宜令三京
諸道州府準此處分新授青州節度使霍彥威奏處斬

新登州刺史王公儼及同謀拒命指揮使李謹王居厚
等八人訖初同光中符習爲青州節度使宦官楊希望
爲監軍專制軍政趙在禮之據魏州習奉詔以本軍進
討俄而帝爲亂軍所劫習卽罷歸希望遣兵邀之習懼
而還至滑州帝遣人招之習至乃從帝入汴希望聞魏
軍亂遣兵圍守習家欲盡殺之公儼素受希望獎愛謂
希望曰內侍宜分腹心之兵監四面守陴者則誰敢異
圖希望從之公儼乘其無備圍希望之第擒而殺之公
儼遂與州將李謹等謀據州城以邀符節卽令軍府飛
章留已兼揚言符習在鎮人不便其政帝乃除公儼爲

登州刺史公儼不時赴任卽以霍彥威代符習聚兵淄州以圖進取彥威至淄州會詔使至青州告諭公儼卽赴所任彥威懲其初心遣人擒公儼于北海縣與同黨斬于州東通鑑彥威聚兵淄州以圖進取公儼懼乙未始之官丁酉彥威至青州追擒之有司上言莊宗附廟懿祖祧遷準例舍故而諱新懿祖例不諱忌日不行香從之壬子襄州節度使劉訓加檢校太傅以僞蜀右僕射中書侍郎平章事趙國公張格爲太子賓客充三司副使從任園請也九月乙卯朔詔汴州扶溝縣復隸許州以前絳州刺史婁繼英爲冀州刺史充北面水陸轉運制置使己未幸至德宮遂幸前隰州

刺史袁建豐之第帝嘗爲太原內牙親將建豐爲副至是建豐風疾沈廢故親幸其第以撫之庚申以都官郎中庾傳美充三州搜訪圖籍使傳美爲蜀王衍之舊僚家在成都便于歸計且言成都具有本朝實錄及傳美使迴所得纔九朝實錄及殘缺雜書而已癸亥應聖節百僚于敬愛寺設齋召緇黃之衆于中興殿講論從近例也戊辰以僞蜀檢校太師兼中書令右金吾衛使張貽範爲兵部尙書致仕都官員外郎于鄴奏請指揮不得書契券輒賣良人從之癸酉天策上將軍湖南節度使開府儀同三司守太師兼尙書令楚王馬殷加檢校

太師守尚書令兩浙節度留後靜海軍節度嶺南西道
觀察處置等使檢校太尉兼中書令錢元瓘加食邑中
吳建武等軍節度嶺南東道觀察處置等使檢校太尉
兼中書令錢元璪加開府階進食邑甲戌以前代州刺
史馬漑爲左衛上將軍致仕己卯以光祿卿羅周敬爲
右金吾衛大將軍充街使辛巳以前復州刺史袁義爲
唐州刺史詔曰鳳翔節度使李曦世聯宗屬任重蕃宣
慶善有稱忠勤顯著旣在維城之例宜新定體之文是
降寵光以隆惇敘俾煥成家之美貴崇猶子之親宜于
本名上加從字癸未文武百僚至張全義私第柩前立

班辭以來月二日葬故也冬十月甲申朔詔賜文武百
僚冬服絲帛有差近例十月初寒之始天子賜近侍執
政大臣冬服帝顧謂判三司任圜曰百僚散未圜奏曰
臣聞本朝給春冬服徧及百僚喪亂已來急于軍旅人
君所賜未能周給今止近臣而已外臣無所賜帝曰外
臣亦吾臣也卿宜計度園遂與安重誨據品秩之差以
定春冬之賜其後遂以爲常右拾遺曹琮上疏內一件
百僚朔望入閣及五日內殿起居請許三署寺監官輪
次轉奏封事從之刑部員外郎孔莊上言自兵興已來
法制不一諸道州縣常行柳杖多不依格律請以舊制

曉諭改而正之丙戌吏部侍郎盧文紀上言請內外文武臣僚每歲有司明定考核將相乞迴御筆以行黜陟疏下中書門下商量宰臣奏請施行從之丁亥雲南嵩州山後兩林百蠻都鬼主右武衛大將軍李卑晚遣大鬼主傳能何華等來朝貢帝御文明殿對之百僚稱賀庚寅以客省使李嚴領泗州防禦使以河中節度副使李鱗爲太子賓客壬辰邠州節度使毛璋移鎮潞州巴州進嘉禾合穗甲午以前隰州刺史袁建豐遙領洪州節度使庚子幽州奏契丹平州守將僞署幽州節度使盧文進率戶口歸順百僚稱賀辛丑契丹遣使來告哀

言國主安巴堅以今年七月二十七日卒詔曰朕近纘皇圖恭修帝道務安夷夏貴洽雍熙契丹主世預歡盟禮交聘問遽聞凶訃倍軫悲懷可輟今月十九日朝參丙午以嵩州山後兩林百蠻都鬼主李卑晚爲寧遠將軍大渡河山前邛川六姓都鬼主懷安郡王勿鄧標莎爲定遠將軍丁未幽州奏盧文進所率降戶孳畜人口在平州西首尾約七十里庚戌以吏部侍郎盧文紀爲御史中丞時御史大夫李琪三上表求解任故也以兵部侍郎劉岳爲吏部侍郎以戶部侍郎充端明殿學士馮道爲兵部侍郎以中書舍人充端明殿學士趙鳳爲

戶部侍郎竝依前充職壬子靜江軍節度使桂州管內
觀察使檢校太師兼中書令扶風郡王馬賓加食邑實
封灃朗觀察使檢校太傅兼侍中馬希振加檢校太尉
盧文進至幽州遣軍吏奉表來上十一月戊午以滄州
留後王景戡爲邢州節度使青州奏得登州狀申契丹
先攻逼渤海國自安巴堅身死雖已抽退尙留兵馬在
渤海扶餘城今渤海王弟領兵馬攻圍扶餘城內契丹
次己未以翰林學士尙書戶部郎中知制誥劉昫爲中
書舍人充職辛酉以前祕書少監溫輦爲太子詹事壬
戌以前房州刺史朱罕爲潁州團練使是日詔曰應今

日已前修蓋得寺院無令毀廢自此已後不得輒有建
造如要願在僧門竝須官壇受戒不得衷私剃度癸丑
日南至帝御文明殿受朝賀仗衛如式禮部侍郎裴皞
上言諸州刺史經三考方請替移詔曰有政聲者就加
恩澤無課最者卽便替移密州獻芝草庚午河陽節度
使夏魯奇移鎮許州留後梁漢顛爲邠州節度使淮南
楊溥遣使貢獻賀登極乙亥以前振武留後張溫爲利
州昭武軍留後以果州刺史孫鐸爲漢州刺史充西川
馬步軍都指揮使壬午靜海軍節度安南管內觀察等
使檢校太尉兼侍中錢元球加開府階進食邑癸未鎮

州奏準詔盧文進所率歸業戶口蠲放租稅三年仍每口給糧五斗十二月戊子盧文進及將吏四百人見賜鞍馬玉帶衣被器玩錢帛有差詔曰朕中興寶祚復正皇綱萬國駢羅俱在照臨之內八紘遼復咸居覆載之間矧彼雲南素歸正朔洎平僞蜀思錫舊恩于乃睠以雖深欲霈覃而未暇百蠻都首領李卑晚六姓蠻都首領勿鄧標莎等天資智勇世稟忠勤梯航之道路纔通琛賫之貢輸已至率其種落竭乃悃誠備傾向化之心深獎來庭之意今則各頒國寵別進王封其儁州刺史李及大鬼主離吠等或遙貢表函或躬趨朝闕亦宜特

授官資各遷階秩勉敦信義無墜冊書示爾金石之堅保我山河之誓欽承休命永保厥終壬辰帝狩于近郊臘故也甲午以契丹盧龍軍節度使盧文進爲檢校太尉同平章事充滑州節度使戊戌詔嚴禁鐵錢庚子皇第二子金紫光祿大夫檢校司徒從榮加檢校太保同平章事天雄軍節度使鄴都留守以武安軍馬步軍都指揮使馬希範爲澧州刺史鐵林都知兵馬馬希杲爲衡州刺史壬寅潁州刺史孫岳加檢校太保獎能政也丙午中書門下奏故事藩鎮節度觀察使帶平章事于都堂上事刊石記壁合納禮錢三十貫以充中書及兩

省公使今欲各納禮錢五百于中書立石亭子鐫勒
宰臣使相官氏授上年月餘充修葺中書及兩省公署
都堂什物從之庚戌御史臺奏京城坊市士庶工商之
家有婢僕自經投井非理物故者近者已來凡是死亡
皆是臺司左右巡舉勘檢施行已久仍恐所差人吏及
街市胥徒同于民家因事邀脅臣詢訪故事凡京城民
庶之家死喪委府縣檢舉軍家委軍巡商旅委戶部然
諸司檢舉後具事由申臺其間或枉濫情故臺司訪聞
卽行舉勘如是文武兩班官吏之家卽是臺司檢舉臣
請自今已後竝準故事施行者詔曰今後文武兩班及

諸道商旅凡有喪亡卽準臺司所奏施行其坊市民庶
軍士之家凡死喪及婢僕非理物故依臺司奏委府縣
軍巡同檢舉仍不得縱其吏卒于物故之家妄有邀脅
或恐暑月尸柩難停若待申聞檢舉縱無邀脅亦須經
時日今後仰本家喚四鄰檢察若無他故逐便葬埋如
後別聞枉濫妄有保證官中訪知勘詰不虛本戶鄰保
竝行科罪如聞諸道州府坊市死喪取分巡院檢舉頗
致淹停人多流怨亦仰約京城事例處分

可輟今月十九日朝叅 案歐陽史作廢朝三日

契丹次四案契丹次蓋言契丹方即次也是書前後如

攻城次鎮州次多單用次字疑即當時案牘之文今

仍其舊附識于此

安巴堅舊作阿保機今改

本外通鑑文獻通考卷一百一十五契丹平章

耶律休哥對懷中書省臣曰平章耶律休哥

卷三

舊五代史卷三十七攷證

舊五代史卷三十七攷證

舊五代史卷三十八

宋門下侍郎參知政事監修國史薛居正等撰

唐書第十四

明宗紀四

天成二年春正月癸丑朔帝御明堂殿受朝賀仗衛如

常儀制曰王者祇敬宗祧統臨寰宇必順體元之典特

新制義之文朕以眇躬獲承丕構襲三百年之休運繼

二十聖之耿光馭朽納隍夕惕之心罔怠法天師古曰

躋之道惟勤今則載戢干戈渾同書軌荷上穹之睠祐

契兆庶之樂推檢玉泥金非敢期于薄德耕田鑿井誠

有慕于前王將陳享謁之儀卽備郊丘之禮宜更稱謂
永耀簡編今改名爲直凡在中外宜體朕懷宣制訖百
僚稱賀有司告郊廟社稷丙辰詔端明殿學士班位宜
在翰林學士之上今後如有轉改只于翰林學士內選
任先是端明殿學士班在翰林學士之下又如三館例
官在職上趙鳳轉侍郎日諷宰相府移之旣而禁林序
列有不可之言安重誨奏行此敕時論便之癸亥宰臣
鄭珪加特進門下侍郎兼太微宮使崇文館大學士任
園加光祿大夫門下侍郎監修國史以端明殿學士尙
書兵部侍郎馮道爲中書侍郎平章事集賢殿大學士

以太常卿崔協爲中書侍郎平章事戊辰以前鄧州節
度使劉玘卒廢朝左拾遺李同上言天下繫囚請委長
吏逐旬親自引問質其罪狀真虛然後論之以法庶無
枉濫從之辛未皇子河中節度使從珂加同平章事以
鎮州留後檢校司徒王建立爲鎮州節度使檢校太傅
癸酉皇第三子金紫光祿大夫檢校司徒從厚加檢校
太保同平章事河南尹判六軍諸衛事北面副招討房
知温奏營州界奚陁羅支內附乙亥以監門衛大將軍
傅璉爲右武衛上將軍丙子詔曰頃自本朝多難雅道
中微皆尙浮華罕持廉讓其有除官蘭省命秩柏臺或

以人事相疎或以私讎見訝稍乖敬奉遽至棄捐蓋司長之振威處君恩而何地今後應新授官朝謝後可準例上事司長不得輒以私事阻滯其本官亦不得因遭抑挫託故請假戊寅皇子從厚領事于河南府宰相鄭珏已下會送非例也已卯樞密使光祿大夫檢校太保行兵部尚書安重誨加開府儀同三司檢校太傅兼侍中樞密使檢校太保守祕書監孔循加檢校太傅同平章事詔崇文館依舊爲宏文館初同光中宰相豆盧革以同列郭崇韜父名宏希其意奏改之今乃復焉辛巳詔曰亂離斯久法制多隳不有舉明從何禁止起今後

三京及州使職員名目是押衙兵馬使騎馬得有暖坐諸都軍將衙官使下繫名糧者只得衣紫阜庶人商旅只著白衣此後不得參雜兼有富戶或投名于勢要以求影庇或希假于攝貴以免丁徭仰所在禁勘以肅奸欺二月壬午朔新羅遣使朝貢丁亥以北京皇城使李繼朗爲龍武大將軍北京都指揮使李從臻爲左衛大將軍捧聖都指揮使李從璨爲右監門衛大將軍戊子以前北面水陸轉運招撫使守冀州刺史烏震領宣州節度使庚寅陝州節度使檢校司徒石敬瑭加檢校太傅兼六軍諸衛副使壬辰西川節度使孟知祥奏泗州

防禦使充西川兵馬都監李嚴煽搖軍衆尋已處斬以
潁州刺史孫岳爲耀州團練使丙申以從馬直指揮使
郭從謙爲景州刺史尋令中使誅之夷其族以其首謀
大逆以弑莊宗也以尚書左丞崔沂爲太子少保致仕
壬寅制曰荆南節度使開府儀同三司守太尉兼尚書
令南平王高季興可削奪官爵仍令襄州節度使劉訓
充南面招討使知荆南行府事許州節度使夏魯奇爲
副招討使統蕃漢馬步四萬人進討以其叛故也又命
湖南節度使馬殷以湖南全軍會合以東川節度使董
璋充東南面招討使新授夔州刺史西方鄴爲副招討

使共領川軍下峽州三面齊進

通鑑攷異梓夔皆在荆南之西南而云東南面

者蓋據夔梓所向言之

甲辰兗州節度使房知温加同平章事宋

州節度使王晏球加檢校太傅丁未以禮部尚書蕭頊
爲太常卿戊申以御史大夫李琪爲右僕射以太子賓
客李璘爲戶部尚書以吏部侍郎李德休爲禮部尚書
以前吏部侍郎崔貽孫爲吏部侍郎以端明殿學士戶
部侍郎趙鳳爲兵部侍郎依前充職庚戌詔諸道節度
使男及親嫡骨肉未沾恩命者特許上聞河南府新安
縣宜爲次赤以雍陵在其界故也辛亥以刑部侍郎歸
藹爲戶部侍郎三月壬子朔以中書舍人馬縉爲刑部

侍郎幸會節園宰相樞密使及在京節度使共進錢絹
請開宴癸丑遣供奉官賈俊使淮南甲寅以西川節度
副使李敬周爲遂州武信軍留後乙卯開府儀同三司
司徒致仕趙光逢進太保致仕仍封齊國公以武信軍
節度使李紹文卒廢朝丙辰宰臣判三司任圖奏諸道
藩府請依天復三年已前許貢綾絹金銀隨其土產折
進馬之直又請選孳生馬分置監牧並從之五代會要
任圖奏三
京畱守諸道節度觀察諸州防禦使刺史每年應聖節
及正至等節貢奉或討伐勝捷各進獻馬伏見本朝舊
事雖以獻馬爲名多將綾絹金銀折充馬價蓋跋涉之
際護養稍難因此羣方俱爲定制自今後伏乞除蕃部
進駢馬外諸州所進馬許依天復三年已前事例隨其
土產折進價直冀貢輸之稍易又誠敬之獲申兼欲于

諸處揀孳生馬準舊制分置監牧仍委三司使別具制置奏聞太常丞段顥請國學五

經博士各講本經以申橫經齒胄之義從之庚申以前
澤潞節度使檢校太傅兼侍中孔勅爲河陽節度使壬
戌幸甘水亭甲子青州節度使霍彥威加檢校太尉兼
中書令以大內皇城使守饒州刺史李從璋爲應州節
度使丁卯詔所在府縣糾察殺牛賣肉犯者準條科斷
其自死牛卽許貨賣肉斤不得過五錢鄉村民家死牛
但報本村所由準例輸皮入官癸酉以戶部郎中知制
誥盧詹爲中書舍人夏四月辛巳朔房知温奏前月二
十一日盧臺戍軍亂害副招討寧國軍節度使烏震尋

與安審通斬殺亂兵訖帝聞之廢朝一日贈震太傅新
羅國遣使貢方物丁亥以華州畱後劉彥琮爲本州節
度使是日幸會節園宴近臣己丑以兵部侍郎崔居儉
權知尚書左丞以戶部侍郎王權爲兵部侍郎以禮部
侍郎裴皞爲戶部侍郎以翰林承旨守中書舍人李愚
爲禮部侍郎充職庚寅御史臺奏今月三日廊下餐百
官坐定兩省官方來自五品已下輒起詔曰每赴廊餐
如對御宴若行私禮是失朝儀各罰半月俸五代會要
長興三年
五月詔文武兩班每遇入閣賜食從前御史臺官及諸
朝官皆在敷政門外兩廊食惟北省官于敷政門內別
坐既爲隔門各不相見致行坐不齊難于肅整今後每
遇入閣賜食北省官亦宜于敷政門外東廊下設席以

北首爲上待班
齊一時就坐

詔盧臺亂軍龍旺所部鄴都奉節等九

指揮三千五百人在營家口骨肉竝可全家處斬龍旺
所部之衆卽梁故魏博節度使楊師厚之所招置也皆
天下雄勇之士日其都爲銀槍効節僅八千人師厚卒
賀德倫不能制西迎莊宗入魏從征河上所向有功莊
宗一統之後雖數頒賚而驕衆無厭同光末自貝州劫
趙在禮據有魏博及帝纘位在禮冀脫其禍潛奏願赴
朝覲遂除皇子從榮爲帥乃令北禦契丹是行也不支
甲冑惟幟于長行表隊伍而已故俛首遄征在途聞李
嚴爲孟知祥所害以爲劔南阻絕互相煽動及屯于盧

臺會烏震代房知溫爲帥轉增浮說震與房知溫博于東寨日亭午大譟于營外知溫上馬出門爲甲士所擁且曰不與兒郎爲主更何處去知溫給之曰馬軍皆在河西步卒獨何爲也遂得躍馬登舟濟于西岸交審通戢騎軍不動知溫與審通謀伺便攻之令亂兵卷甲南行騎軍徐進部伍嚴整叛者相顧失色列炬宵行疲于荒澤遲明潛令外州軍別行知溫等遂擊亂軍橫尸于野餘衆復趨舊寨至則已焚之矣翼日盡戮之脫于叢草溝塍者十無二三迨夜竄于山谷稍奔于定州及王都之敗乃無噍類矣癸巳兗州節度使房知溫加侍中

齊州防禦使安審通加檢校太傅並賞盧臺之功也丁酉僞吳楊溥遣移署右威衛將軍雷現貢端午禮幣辛丑以前利州節度使張敬詢爲雲州節度使遣樞密使孔循赴荆南城下時招討使劉訓有疾故也甲辰以戶部侍郎韓彥憚爲祕書監是日幸石敬瑭安重誨第丙午故振武節度使李嗣恩贈太尉以司封郎中樞密院直學士閻至爲左諫議大夫充職右諫議大夫梁文矩上言平蜀已來軍人剽略到西川人口甚多骨肉阻隔恐傷和氣請許收認帝仁慈素深因文矩之奏詔河南河北舊因兵火擄隔者並從識認是日郢州進白鵲五

月癸丑以福建留後檢校太傅舒州刺史王延鈞為檢校太師守中書令充福建節度使琅邪郡王以太常卿蕭頊為吏部尚書是日懷州進白鵲戊午以三司副使守太子賓客張格卒廢朝以翰林學士駕部郎中知制誥竇夢徵為中書舍人充職癸亥遣宣徽使張延朗調發郡縣糧運赴荆南城下仍以軍法從事以右龍武統軍崔公實為左龍武統軍以前復州刺史高行周為右龍武統軍割果州屬郡乙丑偽吳楊溥貢新茶滄州進白鶴庚午詔罷荆南之師既而令軍士散掠居民而迴詔文武臣僚及諸道節度使刺史有父母在者各與恩

澤宰臣任圜衣辭三司事乃以樞密院承旨孟鵠充三司副使權判六月壬午華州邢州進兩歧麥兗州進三足烏丙戌宰相任圜落平章事守太子少保丁亥詔天下除併無名額寺院以宣徽北院使張延朗為右武衛大將軍判三司依前宣徽使檢校司徒辛卯大理少卿王鬱上言凡決極刑準敕合三覆奏近年已來全隳此法伏乞今後決前一日許一覆奏從之壬辰南面招討使知荊州南行府事襄州節度使檢校太傅劉訓責授檢校右僕射守澶州刺史訓南征無功故有是譴詔喪葬之家送終之禮不得過度乙未戶部尚書李璘上言

請朝班自四品已上官各許薦令錄兩人五品官各薦
簿尉兩人功過賞罰與舉者同之詔從之其所舉人仍
于官告內標所舉姓名或有不公連坐舉主仍令三品
已上各舉堪任兩使判官者丙申以天策上將軍湖南
節度使開府儀同三司檢校太師守尚書令楚王馬殷
爲守太師尚書令封楚國王庚子幸白司馬坡祭突厥
神從北俗之禮也秋七月庚戌朔以宋州節度使王晏
球充北面行營副招討使癸丑以左金吾將軍烏昭遠
爲左衛上將軍充入蠻國信使中書奏馬殷封楚國王
禮文不載國王之制請約三公之儀用竹册從之王戊

西川節度副大使知節度事孟知祥加檢校太尉兼侍
中東川董璋加爵邑以左効義指揮使元習爲資州刺
史右効義指揮使盧密爲雅州刺史癸亥幸冷泉宮甲
子以檢校工部尚書謝洪爲宿州團練使夔州刺史西
方鄴奏殺敗荆南賊軍收峽內三州丙寅升夔州爲寧
江軍以鄴爲節度使戊辰詔曰頃因本朝親王遙領方
鎮遂有副大使知節度事年代已深相沿未改其東川
西川今後落副大使只云節度使庚午遂州畱後李敬
周鄜州畱後劉仲殷竝正授本州節度使壬申兗州節
度使房知溫移鎮徐州徐州節度使安元信移鎮襄州

滄州節度使趙在禮移鎮兗州以齊州防禦使安審通
為滄州節度使是日詔陵州合州長流百姓豆盧革韋
說等宜令逐處刺史監賜自盡其骨肉竝放逐便是日
逐段凝于遼州劉訓于濮州溫韜于德州甲戌太子少
保任圜上表乞致仕仍于外地尋醫詔從之丁丑以左
金吾大將軍曹廷隱為齊州防禦使八月己卯朔日有
食之辛巳以右諫議大夫孔昭序為給事中以祕書少
監崔懋為右諫議大夫壬午以右驍衛大將軍劉衡為
左領衛上將軍以鄴都副畱守趙敬怡為右衛上將軍
判興唐府事乙酉昆明大鬼主羅殿王普露靜王九部

落各差使隨牂牁清州八郡刺史宋朝化等一百五十
三人來朝進方物各賜官告繒綵銀器放還蕃丙戌以
御史中丞盧文紀為工部尚書以左諫議大夫梁文矩
為御史中丞鄧州畱後陶玘貶嵐州司馬以其為內鄉
縣令盛歸仁所訟稅外科率故也仍賜歸仁緋袍魚袋
癸巳幸皇子從榮第宣禁中伎樂觀宴從榮進馬及器
幣帝因以伎樂賜之華州上言渭河泛濫害稼丁酉以
吏部郎中龔文宣公孔邈為左諫議大夫史館修撰趙
熙上言應內中公事及詔書奏對應不到中書者請委
內臣一人抄錄月終送史館詔差樞密直學士錄送青

州進芝草新州奏契丹乞置互市癸卯汴州節度使朱
守殷加兼侍中鄆州節度使符習加檢校太尉甲辰皇
子從榮娶鄆州節度使劉仲殷女是夕禮會百僚表賀
九月辛亥義武軍節度使檢校太尉兼中書令王都加
食邑實封幽州節度使趙德鈞加檢校太尉鎮州節度
使王建立加同平章事僞吳楊溥遣使以應聖節貢獻
已未以前雲州節度使高行珪爲鄧州節度使是日出
御札曰歷代帝王以時巡狩一則遵乎禮制一則按察
方區矧彼夷門控茲東夏當先帝戡平之始爲眇躬殿
守之邦俗尚貞純兵懷忠勇自元臣鎮靜庶事康和兆

民咸樂于有年闔境彌堅于望幸事難違衆議在省方
朕取十月七日親幸汴州庚申以衛尉卿李延光爲大
理卿北京畱守李彥超上言先父存審本姓符氏蒙武
皇賜姓乞卻還本姓從之乙丑夏州節度使李仁福鳳
翔節度使李從曠朔方節度使韓洙竝加食邑改賜功
臣以汝州防禦使趙延壽爲河陽節度使以比部郎中
知制誥劉贊爲中書舍人以河陽掌書記程遜爲比部
員外郎知制誥以代州刺史李德珣爲蔚州刺史丙寅
樞密使孔循兼東都畱守襄州夏魯奇上言荆南高季
興遣使持書乞修貢奉詔魯奇不納詔諸州錄事參軍

不得兼使府賓職已巳鄧州節度使史敬鎔加檢校太保同州節度使盧質加檢校司徒御史臺奏每遇入閣舊例只一員侍御史在龍墀邊祇候彈奏公事或有南班失儀點檢不及今欲依常朝例差殿中侍御史二員押鐘鼓樓位仍各綴供奉班出入從之以青州節度副使淳于晏爲亳州團練使契丹遣使美稜瑪古已下朝貢戊寅西川奏據黎州狀雲州使趙和于大渡河南起舍一間畱信物十五籠并雜牋詩一卷遞至闕下冬十月己卯朔帝御文明殿視朝癸未亳州刺史李鄴貶郴州司戶又貶崖州長流百姓所在賜自盡判官樂文紀

配祁州責其違法贖貨也乙酉駕發西京詔畱宰相崔協以奉祠祭丁亥帝宿于滎陽汴州朱守殷奏都指揮使馬彥超謀亂已處斬訖戊子次京水知朱守殷反帝親統禁軍倍程前進翼日至汴州攻其城拔之守殷伏誅丙申磁州刺史藥縱之上言今月十二日供奉官王仁鎬至稱制殺太子少保致仕任圜契丹遣使持書求碑石欲爲其父表其葬所戊戌詔曰諸道州府自同光三年已前所欠秋夏稅租并主持務局敗闕課利并沿河舟船折欠天成元年殘欠夏稅竝特與除放時重誨旣構任圜之禍恐人非之思沛恩于衆以掩已過乃奏

日三司積欠約二百萬貫虛繫帳額請並蠲放帝重違其意故有是詔時議者以蠲隔年之賦猶或惠民場院課利一概除之得不啓奸倖之門乎已亥詔曰太子少保致仕任園早推勳舊曾委重難旣退免于劇權俾優閒于外地而乃不遵禮分潛附守殷緘題罔避于嫌疑情旨頗彰于怨望自收汴壘備見蹤由若務含宏是孤典憲尚全大體止罪一身已令本州私第自盡其骨肉親情僕使等竝皆放罪辛丑詔曰后來其蘇動必從于人欲天監厥德靜宜布于國恩近者言幸浚郊暫離洛邑蓋逢歲稔共樂時康不謂奸臣遽彰逆狀爲厲之階

旣甚覆宗之禍自貽俾我生靈遭茲紛擾永言軫惻無輟寐興宜覃雨露之恩式表雲雷之澤應汴州城內百姓旣經驚劫宜放二年屋稅諸處有曾受逆人文字者隨處焚毀應天下見禁囚徒除十惡五逆殺人放火劫盜合造毒藥官典犯贓僞行印信屠牛外罪無輕重竝從釋放應有民年八十已上及家長者有廢疾者免一丁差役云以山南西道節度使張筠爲西京畱守行京兆尹青州節度使霍彥威差人走馬進箭一對賀誅朱守殷帝卻賜彥威箭一對傳箭蕃家之符信也起軍令衆則使之彥威本非蕃將以臣傳箭于君非禮也癸卯

以權知汴州事陝州節度使石敬瑭爲汴州節度使兼
六軍諸衛副使侍衛親軍馬步都指揮使鳳翔奏地震
丙午威武軍節度副使檢校太尉守建州刺史王延亶
加同平章事守建州刺史充奉國軍節度副使兼威武
軍節度副使詔割施州卻屬黔南十一月巳酉帝祭蕃
神于郊外庚戌以皇城使行袁州刺史李從敏爲陝州
節度使乙卯青州霍彥威鄆州符習來朝以太子詹事
溫輦爲吏部侍郎徐州房知溫來朝戊午黔南節度使
李紹義加檢校太保庚申皇子河中節度使檢校太保
同平章事從珂鄴都畱守檢校太保同平章事從榮河

南尹判六軍諸衛事檢校太保同平章事從厚竝加檢
校太傅進爵邑貝州刺史竇廷琬上言請制置慶州青
白兩池逐年出絹十萬匹米萬石詔升慶州爲防禦所
以廷琬爲使壬申詔霍彥威等歸藩詔太宗朝左僕射
李靖可冊贈太保鄭州僕射陂可改爲太保陂時議者
以僕射陂者後魏孝文帝賜僕射李沖故因以爲名及
是命之降以爲李靖蓋誤也契丹遣使摩琳等率其屬
來乞通和十二月戊寅朔以前鳳翔畱後高允貞爲右
監門上將軍詔以施州爲夔州屬郡以其便近故也遣
飛勝指揮使于契丹賜契丹主錦綺銀器等兼賜其母

繡被瓔珞已卯蔚州刺史周令武得代歸闕帝問北州
事令武奏曰山北甚安諸蕃不相侵擾鴈門已北東西
數千里斗粟不過十錢帝悅顧謂左右曰須行善事以
副天道居數日帝延宰臣于元德殿言及民事馮道奏
曰莊宗末年不撫軍民惑于聲樂遂致人怨國亂陛下
自膺人望歲時豐稔亦淳化所致也更願居安思危帝
然之許州地震庚辰皇子鄴都畱守從榮移鎮太原以
北京畱守符彥超爲潞州節度使乙酉以彰國軍節度
使李從璋昧于政理詔歸闕敕新及第進士有聞喜宴
逐年賜錢四十萬己丑兗州節度使趙在禮來朝詔出
潛龍宅米以賑百官壬辰以太傅致仕齊國公趙光逢
卒轍朝丙申許州節度使夏魯奇移鎮遂州庚子幸石
敬瑭公署及康義誠私第甲辰狩于東郊臘也丙午追
尊四廟以應州舊宅爲廟

舊五代史卷三十八

舊五代史卷三十八攷證

唐明宗紀四遣供奉官賈俊使淮南 賈俊九國志作

賈進攷冊府元龜所引薛史亦作俊今仍其舊

房知溫奏前月二十一日盧臺戍軍亂害副招討寧國

軍節度使烏震尋與安審通斬殺亂兵訖 案五代

春秋盧臺戍軍亂房知溫討平之據是書房知溫傳

及通鑑知溫初誘戍軍爲亂繼恐事不濟乃與安審

通謀討亂兵也五代春秋所書殊非事實

五品官各薦簿尉兩人 案五代會要作五品六品官

各許薦簿尉兩人

所舉姓名或有不公 案原本脫公字今據五代會要
增入

夔州刺史西方鄴奏殺敗荆南賊軍收峽內三州 案
通鑑六月西方鄴敗荆南水軍于峽中復取夔忠萬
三州是書繫七月甲子蓋以奏聞之日爲據歐陽史
與是書同

詔陵州合州長流百姓豆盧革韋說等宜令逐處刺史
監賜自盡 案五代春秋作元年七月殺豆盧革韋
說攷歐陽史元年七月貶豆盧革爲辰州刺史韋說
淑州刺史甲申流革于陵州說于合州二年七月殺

豆盧革韋說與是書同五代春秋統繫于元年誤也
今月十二日供奉官王仁鎬至稱制殺太子少保致仕
任圜 案安重誨害任圜五代春秋及通鑑俱不書
日歐陽史作乙未殺太子少保致仕任圜據是書作
十二日是年十月爲己卯朔十二日乃庚寅也與歐
陽史異日

美稜瑪古舊作梅老沒骨今改 摩琳舊作梅老今改

舊五代史卷三十八攷證

宋門下侍郎參知政事監修國史薛居正等撰

唐書第十五

明宗紀五

天成三年春正月戊申朔帝御崇元殿受朝賀仗衛如式辛亥前河陽節度使檢校太傅兼侍中孔勅以太子太傅致仕癸丑詔取今月十七日幸鄴都甲寅以國子祭酒朱守素卒廢朝丙辰以鎮南軍節度使袁建豐卒廢朝詔贈太尉丁巳詔曰朕聞堯舜有恤刑之典貴務好生禹湯申罪已之言庶明知過今月十七日據巡檢

軍使渾公兒口奏稱有百姓二人以竹竿習戰鬪之事
朕初聞奏報實所不容率爾傳宣令付石敬瑭處置今
且重誨敷奏方知悉是幼童爲戲載聆讜議方覺失刑
循揣再三愧惕非一亦以渾公兒誑誣頗甚石敬瑭詳
覆稍乖致人枉法而殂處朕有過之地今減常膳十日
以謝幽冤其石敬瑭是朕懿親合施極諫旣茲錯誤宜
示省循可罰一月俸渾公兒決脊杖二十仍銷在身職
銜配流登州小兒骨肉賜絹五十匹粟麥各百石便令
如法埋葬兼此後在朝及諸道州府凡有極刑竝須子
細裁遣不得因循百寮進表稱賀已未中書門下奏國

子祭酒望令宰相兼判乃詔崔協判之

五代會要載原

歷朝所貴爰從近代不重此官况屬聖朝方勤庶政辛
須宏雅道以振時風望令宰臣一員兼判國子祭酒

西以前潞州節度使毛璋爲右金吾上將軍以左驍衛

上將軍華溫琪爲右金吾大將軍以春州刺史張虔釗

爲鄭州防禦使時契丹方陷平州癸亥詔應廟諱文字

只避正文其偏旁文字不用虧缺點畫契丹遣使托諾

巴摩哩等貢獻帝遣指揮使奔托山押國信賜契丹主

妻戊辰以隨駕馬軍都指揮使富州刺史康義誠兼領

鎮南軍節度使以隨駕步軍都指揮使潮州刺史楊漢

章遙領寧國軍節度使中書上言舊制遇二月十五日

爲聖祖降聖節應休假三日準會昌元年二月勅休假
一日請準近勅從之吐蕃伊瑋雅遜等六人回鶻米里
都督等四人竝授歸德懷遠將軍悉放還蕃庚午冊贈
故瀛州刺史李嗣頽爲太尉壬申冊贈故皇子檢校司
空從謹爲太保甲戌制以楚國夫人曹氏爲淑妃以韓
國夫人王氏爲德妃仍令所司擇日冊命二月丁丑朔
有司上言太陽合虧旣而有雲不見羣官表賀詔巡幸
鄴都宜亭庚辰僞吳楊溥遣使貢獻賀誅朱守殷帝以
荆南拒命通連淮夷不納其使遣還壬午以光祿卿韋
寂卒廢朝贈禮部尚書癸未工部尚書盧文紀貶石州

司馬員外安置文紀私諱業時新除于鄴爲工部郎中
舊例寮屬名與長官諱同或改其任文紀素與宰相崔
協有隙故中書未議改官于鄴授官之後文紀自請連
假鄴尋就位及差延州官告使副未行文紀參告且言
侯鄴迴日終請換曹鄴其夕遂自經而死故文紀貶官
以倉部郎中何澤爲吏部郎中獎伏閣諫巡幸鄴都也
丁亥天德軍節度使郭承豐加檢校司徒辛卯以山南
西道節度使張筠爲左驍衛上將軍詔中外羣臣父母
亾沒者竝與追封贈癸巳以禮部尚書崔貽孫卒輟朝
甲午以吐渾寧朔奉化兩府都知兵馬使李紹魯爲吐

渾寧朔府都督乙未以樞密使兼東都留守孔循爲許州節度使兼東都留守鄧州節度使高行珪移鎮安州應州節度使李從璋移鎮滑州滑州節度使盧文進移鎮鄧州丁酉以責授檀州刺史劉訓爲右龍武大將軍已亥回鶻可汗仁喻遣都督李阿爾珊等貢獻壬寅以左金吾大將軍羅周敬爲同州節度使甲辰以威塞軍節度使張廷裕卒廢朝詔贈太保以耀州團練使孫岳爲閬州團練使以左監門上將軍高允貞爲右金吾衛大將軍以右金吾衛大將軍華溫琪爲左金吾衛大將軍三月丁未朔以久雨爲災詔文武百辟極言時政得

失丁巳以邢州節度使王景戡爲華州節度使以前北京副留守李從溫爲邢州節度使己未以宰臣鄭珪爲開府儀同三司左僕射致仕加食邑五百戶庚辰以前復州刺史翟章爲新州威塞軍畱後中書奏孟夏薦饗合宰相行事在朝只有宰相二員今東都畱守孔循帶平章事宜令攝太尉行事孔循稱使相有戎機不當司祠祭重事癸亥以前鎮州節度使王建立爲右僕射兼中書侍郎平章事集賢殿大學士判三司西方鄴上言收復歸州以前鄭州刺史楊漢賓爲洋州武定軍畱後戊辰以前彰國軍節度副使陳臯爲鳳州武興軍畱後

以前蔡州刺史孫漢韶爲應州彰國軍留後以宣徽南院使范延光爲樞密使以宣徽北院使判三司張延朗爲宣徽南院使以前冀州刺史婁繼英爲耀州團練使以懷州刺史張廷蘊爲金州防禦使己巳命范延光權知鎮州軍府事西方鄴奏于歸州殺敗荆南賊軍數千人時有太白山道士解元龜自西川至對于便殿稱年一百一歲既而上表乞西都畱守兼西川制置使要修西京宮闕帝謂侍臣曰此人老耄自遠來朝方期別有異見反爲身名甚可笑也賜號爲知白先生賜紫放歸山甲戌冊回鶻可汗仁喻爲順化可汗夏四月戊寅以

汴州節度使石敬瑭爲鄴都畱守充天雄軍節度使加同平章事以樞密使權知鎮州軍府事檢校太保范延光爲鎮州節度使兼北面水陸轉運使以司農卿鄭績爲太僕卿壬午夔州節度使東南面副招討使西方鄴加檢校太保甲申皇第三女石氏封永寧公主第十三女趙氏封興平公主仍令所司擇日冊命幽州上言契丹有書求樂器乙酉達鞞遣使朝貢以隨駕馬軍都指揮使康義誠爲侍衛親軍馬步軍都指揮使丙戌樞密使安重誨兼河南尹以皇子河南尹判六軍諸衛事從厚爲汴州節度使判六軍如故丁亥復州奏湖南大破

淮賊于道人磯以西川馬步軍都指揮使趙廷隱兼漢州刺史從孟知祥之請也

九國志趙廷隱傳知祥至蜀康延孝陷漢州遣廷隱率兵擊破之擒延孝檻送闕下知祥奏加

檢校司空漢州刺史遂畱屯成都洋州上言重開入蜀舊路三百餘里比今官路較二十五程而近癸巳殿

中少監石知訥貶憲州司戶坐煽惑軍鎮也北面副招

討宋州節度使王晏球以定州節度使王都反狀聞庚

子制義武軍節度使檢校太尉兼中書令太原王王都

削奪官爵壬寅以王晏球為北面行營招討使知定州

行軍州事以滄州節度使兼北面行營馬軍都指揮使

安審通為副招討使兼諸道馬軍都指揮使以左散騎

常侍蕭希甫兼判大理卿事西京奏前樞密使張居翰

卒五月乙巳朔回鶻可汗仁喻封順化可汗丁未鄴都

畱守天雄軍節度使石敬瑭河陽節度使趙延壽竝加

駙馬都尉以右僕射李琪為太子少傅辛亥沙州節度

使曹義金加爵邑王晏球上言收奪得定州北西二關

城癸丑湖南馬殷奏二月中大破淮寇二萬生擒將士

五百餘人中書上言諸道薦人總與不可全阻又難今

後節度使每年許薦二人帶使相者許薦三人團練防

禦使各一人節度觀察判官竝聽旨授書記已下卽許

隨府從之以六軍判官尚書司封郎中史圭為右諫議

大夫充樞密直學士詔州縣官以三十月爲考限刺史以二十五月爲限以到任日爲始己未幽州奏契丹託諾領二千騎西南趣定州以前同州節度使盧質行兵部尚書判太常卿事辛酉以天雄軍節度副使判興唐府事趙敬怡爲樞密使詔曰上柱國勳之極也近代已來文臣官階稍高便授柱國歲月未深便轉上柱國武資初官便授上柱國今後凡加勳先自武騎尉十二轉方授上柱國永作成規不令踰越丁卯鎮州奏今月十八日王師不利于新樂壬申王晏球奏今月二十一日大破定州賊軍及契丹于曲陽斬獲數千人王都與託

諾以數十騎復入于定州六月己卯以右金吾上將軍毛璋爲左金吾上將軍以前安州節度使史敬鎔爲右金吾上將軍以前華州節度使劉彥琮爲左武衛上將軍壬午放內園鹿七頭于深山乙酉皇子故金槍指揮使檢校左僕射從璟贈太保己丑幽州趙德鈞奏殺契丹千餘人于幽州東獲馬六百匹壬辰宰臣馮道率百寮上表請上尊號曰聖明神武文德恭孝皇帝詔報不允丙申馮道等再上尊號不允戊戌以西京副留守知留守事張遵誨行京兆尹秋七月乙巳詔故僞蜀主王衍追封順正公以諸侯禮葬丙午以前武信軍節度使

李敬周爲邠州節度使丁未以滄州節度使安審通卒于師輟朝壬子以朔方節度使韓洙卒廢朝甲寅王晏球奏六月二十二日進攻逆城將士傷者三千人時晏球知城中有備未欲急攻朱宏昭張虔釗切于立功促攻賊壘晏球不得已而進兵遂致傷痍者衆乙卯以太子少保李茂勳卒輟朝己未詔弛麩禁許民間自造于秋苗上徵納麩價畝出五錢時孔循以麩法殺一家于洛陽或獻此議以爲愛其人便于國故行之宗正卿李紆除名刑部侍郎馬縞貶綏州司馬刑部員外郎李慎儀貶階州司戶初李紆差攝陵臺令張保嗣等各虛稱

試銜爲奉先令王延朗所訟大理寺斷以詐假官論刑部詳覆稱非詐假大理執之名兩司廷議刑部理屈故有是貶紆續勅配隴州徒一年未幾詔曰天下府州例是攝官皆結試銜或因勘窮便關詐假已前或有稱試銜一切不問此後竝宜禁止曹州刺史成景宏貶綏州司戶參軍續勅長流宥州尋賜自盡坐受本州倉吏錢百緡也壬戌齊州防禦使曹廷隱以奏舉失實配流永州續勅賜自盡甲子王晏球奏今月十九日契丹七千騎來援定州王師逆戰于唐河北大破之追至滿城又破之斬二千級獲馬千匹戊辰詔福建節度使王延鈞

依前檢校太師守中書令進封閩王已巳王晏球奏此
月二十一日追契丹至易州掩殺四十里擒獲甚衆故
朔方節度使韓洙贈太尉以兵部侍郎王權御史中丞
梁文矩竝爲吏部侍郎以左諫議大夫呂夢奇爲御史
中丞八月癸酉朔以翰林學士守中書舍人李懌劉昫
竝爲戶部侍郎充職以吏部侍郎劉岳守祕書監以吏
部侍郎韓彥暉守禮部尚書以戶部侍郎韓藹守太子
賓客以戶部侍郎裴皞守兵部侍郎以中書舍人張文
寶守刑部侍郎詔凡有姓犯廟諱者以本望爲姓丁丑
以檢校尚書右僕射守龍武大將軍劉訓爲晉州節度

使檢校太傅壬午幽州趙德鈞奏于府西邀殺契丹敗
黨數千人生擒首領特哩袞及其屬凡五十餘人是時
官軍襲殺契丹屬秋雨繼降泥濘莫進人饑馬乏散投
村落所在村民持白挺毆殺之德鈞出兵接于要路惟
奇峯嶺北有馬潛遁脫者數十餘無噍類帝致書諭其
本國辛卯以朔方軍畱後韓璞爲朔方軍節度使靈武
雄警甘肅等州觀察使檢校司徒帝聞隨鄧復郢均房
之民父母骨肉有疾以長竿遙致粥食而餉之出嫁女
夫家不遣來省疾乃下詔委長吏嚴加禁察房州奏新
開山路四百里南通夔州畫圖以獻以前洋州節度使

戴思遠爲太子太保致仕庚子詔今後翰林學士入院以先後爲班次承旨一員不計官資先後在學士之上閏月丁未兩浙節度觀察留後清海軍節度使檢校太師兼中書令錢元瓘加杭州越州大都督府長史充鎮東鎮海等軍節度使戊申趙德鈞獻戎俘于闕下其蕃將特哩袞等五十人留于親衛餘契丹六百人皆斬之乙卯升楚州爲順化軍以明州刺史錢元珣爲本州節度使以吏部尚書蕭頊爲太子少保契丹遣使來貢獻契丹平州刺史張希崇上表歸順乙丑陝州節度使李從敏移鎮滄州以宣徽南院使張延朗爲陝州節度使

詔在京遇行極法日宜不舉樂兼減常膳諸州遇行極法日禁聲樂己巳滑州掌書記孟昇匿母服大理寺斷處流特勅孟昇賜自盡觀察使觀察判官錄事參軍失其糾察各行殿罰襄邑縣民間威父爲人所殺不雪父寃有狀和解特勅處死是月二十七日大水河水溢絳州地震九月乙亥以捧聖左右廂副都指揮使索自通爲雲州節度使丁丑以太府卿判四方館事李郁爲宗正卿壬午以晉州節度使安崇阮爲左驍衛上將軍甲申吐蕃回鶻冬遣使貢獻壬辰宰臣王建立進玉盃上有文曰傳國萬歲盃乙未詔德州流人溫韜遼州流人段

疑嵐州司戶陶玘憲州司戶石知訥原州司馬聶嶼並
宜賜死于本處暴其宿惡而誅之也丙申以邠州節度
使梁漢顒爲右威衛上將軍丁酉河陽節度使駙馬都
尉趙延壽爲檢校司徒己亥詔徐州節度使房知溫兼
荆南行營招討使知荆南行府事冬十月甲辰制瓊華
長公主孟氏可冊爲福慶長公主丙午以滄州節度使
李從敏兼北面招討使戊申帝臨軒命禮部尚書韓彥
暉工部侍郎任贊往應州奉冊四廟詔汾州節度使李
敬周攻慶州以刺史竇廷琬拒命故也戊午契丹平州
刺史張希崇已下八十餘人見于元德殿頒賜有差突

厥首領張慕進等來朝貢甲子安州節度使高行珪奏
屯駐左神捷左懷順軍士作亂已逐殺出城詔升壽州
爲忠正軍戊辰以雲州節度使索自通領壽州節度使
以前雲州節度使張溫復爲雲州節度使庚午夜西南
有彗星長丈餘在牛星五度十一月癸酉日南至帝御
崇元殿受朝賀甲戌捧聖指揮使何福進招收到安州
作亂兵士五百人自指揮使已下至節級四十餘人並
斬餘衆釋之壬午房知溫奏荆南高季興卒中書舍人
劉贊奏請節度使及文班二品已上謝見通喚從之是
日以契丹所署平州刺史光祿大夫檢校太保張希崇

爲汝州刺史加檢校太傅己丑中書奏今後或有封冊
請御正衙從之青州奏節度使霍彥威卒輟朝三日詔
宰臣王建立權知青州軍州事庚寅禮部員外郎和凝
奏應補齋郎竝須引驗正身以防僞濫舊例使蔭一任
官補一人今後改官須轉品卽可如無子許以親姪繼
限念書十卷試可則補從之甲午以尚書左僕射同平
章事集賢殿大學士判三司王建立爲青州節度使檢
校太尉同平章事丙申帝謂侍臣曰古鐵券如何趙鳳
對曰帝王誓文許其子子孫孫長享爵祿帝曰先朝所
賜惟朕與郭崇韜李繼麟三人爾崇韜繼麟尋已族滅

朕之危疑慮在旦夕于是嗟歎久之趙鳳曰帝王執信
故不必銘金鏤石矣吏部郎中何澤奏流外官請不試
書判之類從之吐蕃遣使朝貢戊戌前安州節度副使
范延榮竝男皆斬于軍巡獄爲高行珪誣奏故也十二
月壬寅朔詔真定府屬縣宜準河中鳳翔例升爲次畿
真定縣升爲次赤甲辰邠州節度使李敬周奏收下慶
州刺史竇廷琬族誅

舊五代史卷三十九

舊五代史卷三十九攷證

唐明宗紀五契丹陷平州 案契丹陷平州歐陽史作

丁巳通鑑不書日攷平州自梁開平中劉守光以賂

契丹天成元年盧文進舉其地以歸于唐至三年復

為遼人所取自是平州遂屬于遼宋人論石晉賂遼

故地兼及平州蓋未詳攷今附識于此

為左驍衛上將軍 案通鑑作左衛上將軍歐陽史從

是書作左驍衛

已亥回鶻可汗仁喻遣都督李阿爾珊等貢獻 案李

阿爾珊來貢歐陽史作戊戌

北面副招討宋州節度使王晏球以定州節度使王都反狀聞案遼史王都以定州來歸作三月事五代春秋及通鑑竝從是書作四月

壬戌齊州防禦使曹廷隱以奏舉失實配流永州續勅賜自盡案歐陽史作己未殺齊州防禦使曹廷隱己未在壬戌前三日不應發配在後賜死轉在前也

歐陽史疑訛

壬午幽州趙德鈞奏于府西邀殺契丹案通鑑作八月壬戌趙德鈞邀擊契丹據是書八月係癸酉朔不得有壬戌疑通鑑誤

邠州節度使李敬周李敬周通鑑作李敬通是書前後竝作敬周歐陽史亦作敬周疑通鑑傳刻之訛以刺史竇廷琬拒命故也案竇廷琬反通鑑從是書作十月歐陽史繫于十月以前與是書異

突厥首領張慕進等來朝貢慕進歐陽史作慕晉壬午房知溫奏荆南高季興卒案高季興卒通鑑作十二月丙辰詳見通鑑攷異

檢校太保張希崇爲汝州刺史案歐陽史作汝州防禦使通鑑從是書作刺史

托諾巴摩哩舊作禿泐悲梅老今改伊埒雅遜舊作

野利延孫今改阿爾珊舊作阿山今改託諾舊
作禿飯今改特里哀舊作惕隱今改

斂對太尉魏帝崇為魏陳史案魏國史今改
十二月丙辰帝見魏證文是

壬午吳映監奏漢南高李與等案書
突颯首賄建慕等六陳黃慕等

并十日魏國史魏二十日以前
以陳史實我魏命

魏並并魏國史魏
舊五代史卷三十九攻證

舊五代史卷四十

宋門下侍郎參知政事監修國史薛居正等撰

唐書第十六

明宗紀六

天成四年春正月壬申朔帝御崇元殿受朝賀仗衛如
儀幽州節度使趙德鈞奏臣孫贊年五歲默念論語孝
經舉童子于汴州取解就試詔曰都尉之子太尉之孫
能念儒書備彰家訓不勞就試特與成名宜賜別勅及
第附今年春勝戊子放元年應欠秋稅以左衛上將軍
安崇阮為黔南節度使壬辰回鶻入朝使徹伯爾等五

人各授懷化司戈放還以北京副畱守馮贇爲宣徽使
判三司戊戌禁天下虛稱試攝銜西川孟知祥奏支屬
刺史乞臣本道自署二月乙巳王晏球奏此月三日收
復定州獲王都首級生擒契丹託諾等二千餘人百寮
稱賀已畢乃詔取今月二十四日車駕還東京辛亥以
北面行營招討使宋州節度使王晏球爲鄆州節度使
加兼侍中以北面行營副招討使滄州節度使李從敏
爲定州節度使以北面行營兵馬都監鄭州防禦使張
虔釗爲滄州節度使幽州節度使趙德鈞加兼侍中乙
卯以樞密使趙敬怡權知汴州軍州事丙辰邢州奏定

州送到僞太子李繼陶已處置訖辛酉帝御咸安樓受

定州俘馘百官就列宣露布于樓前禮畢以王都首級

獻于太社王都男四人弟一人託諾父子二人竝磔于

市

五代會要尚書兵部宣露布于樓前宣訖尚書刑部
侍郎張文寶奏曰逆賊王都首級請付所司大理卿
蕭希甫受之以出獻于郊社其時露布之文類制勅之
王都男并蕃將等磔于開封橋

體蓋執筆者誤頗爲識者所嗤樞密使趙敬怡卒贈太

傅以端明殿學士趙鳳權知汴州軍州事甲子車駕發

汴州丙寅至鄭州賜左僕射致仕鄭珪錢二十萬丁卯

宰相崔協卒詔贈尚書左僕射東都畱守太子少傅李

琪等奏至偃師縣奉迎時琪奏章中有敗契丹之凶黨

破真定之逆城之言詔曰契丹卽爲凶黨真定不是逆城李琪罰一月俸庚午車駕至自汴州三月甲戌馮道進表乞命相丙戌詔皇城使李從璨貶授房州司戶參軍仍令盡命從璨帝之諸子也先是帝巡幸汴州畱從璨以警大內從璨因遊會節園酒酣戲登御榻安重誨奏之故置于法焉壬辰中書奏今後羣臣內有乞假覲省者請量賜茶藥從之乙未以前鄆州節度使符習爲汴州節度使丙申詔鄴都幽鎮滄邢易定等州管內百姓除正稅外放免諸色差配以討王都之役有輓運之勞也夏四月庚子朔禁鐵蠟錢壬寅重修廣壽殿成有

司請以丹漆金碧飾之帝曰此殿經焚不可不修但務宏壯不勞華侈湖南奏敗荆南賊軍于石首鎮詔沿邊置場買馬不許蕃部直至闕下先是党項諸蕃凡將到馬無駑良竝云上進國家雖約其價以給之及計其館穀錫賚所費不可勝紀計司以爲耗蠹中華遂止之壬子以皇子北京畱守河東節度使從榮爲河南尹判六軍諸衛事以皇子河南尹判六軍諸衛事從厚爲北京畱守以河陽節度使趙延壽爲宋州節度使以待衛親軍都指揮使鎮南軍節度使康義誠爲河陽節度使契丹寇雲州癸丑契丹遣紐赫美稜等復率其屬來朝貢

稱取托諾等骸骨竝斬于北市甲寅以端明殿學士趙鳳爲門下侍郎兼工部尚書平章事丙辰諫議大夫致仕襲文宣公孔邈卒庚申以王建立孔循帶中書直省吏歸藩竝追迴壬戌幽州節度使趙德鈞兼北面行營招討使鎮州節度使范延光加檢校太傅戊辰中書奏五月一日應在京九品已上官及諸道進奉使請準貞元七年勅就位起居永爲恒式從之五月己巳朔帝御文明殿受朝丙子以夔州節度使西方鄴卒輟朝丁丑大理卿李保殷卒己卯以忠武軍節度使索自通爲京兆尹充西京畱守以左威衛上將軍朱漢賓爲潞州節

度使乙酉以黔州節度使安崇阮爲夔州節度使以左驍衛上將軍張溫爲洋州節度使以黔州畱後楊漢賓爲本州節度使中書奏太常寺定少帝諡昭宣光烈孝皇帝廟號景宗伏以少帝今不入廟難以言宗只云昭宣光烈孝皇帝從之丁亥以鳳州武興軍畱後陳臯爲武興軍節度使以新州威塞軍畱後翟璋爲威塞軍節度使壬辰以權知尚書右丞崔居儉爲尚書右丞詔葺天下廨宇丙申襄州奏荆南高從誨乞歸順雲州奏契丹犯塞六月辛丑以左散騎常侍姚顛爲兵部侍郎壬寅夔州節度使楊漢章移鎮雲州以北京馬步軍都指

揮使兼欽州刺史張敬達爲鳳州節度使癸卯以前西
京副畱守事張遵誨行衛尉事充客省使國子博士田
敏請葺四郊祠祭齋室丙午以沂州刺史張萬進爲安
北都護充振武軍節度使戊申以宿州團練使康思立
爲利州節度使登州刺史孫元停任坐在任無名科率
故也詔鄴都仍舊爲魏府應魏府汴州益州宮殿悉去
鴟尾賜節度使爲衙署辛亥以權知朔方軍畱後定難
軍都知兵馬使韓澄爲朔方畱後癸丑以前潞州節度
使符彥超爲左驍衛上將軍詔諸道節度使行軍司馬
名位雖高或帥臣不在其州事宜委節度副使權知又

詔藩郡所請賓幕及主事親從者悉以名聞丙辰權知
荆南軍府事高從誨上章首罪乞修職貢仍進銀三千
兩贖罪壬戌幸至德宮詔京城空地課人蓋造如無力
者許人請射營構秋七月庚午以前西京畱守判官張
罇爲司農卿壬申貶前左金吾上將軍毛璋爲儒州長
流百姓尋賜自盡以其在藩鎮陰蓄奸謀故也甲戌御
史中丞呂夢奇責授太子右贊善大夫坐曾借毛璋馬
故也已卯以工部侍郎任贊爲左散騎常侍以樞密直
學士左諫議大夫充匭使閤至爲工部侍郎充職遂州
進嘉禾一莖九穗壬午以給事中判大理卿事許光義

實錄太祖獻祖懿祖名爲紀年錄從之五代會要天咸三年十二月史

館奏據左補闕張昭遠狀嘗讀國書伏見懿祖昭烈皇帝自元和之初獻祖文皇帝于大和之際立功王室陳

力國朝太祖武皇帝自咸通後來勤王戮力翦平多難

頻立大功三換節旄再安京國莊宗皇帝終平大憝奄

有中原倘闕編修遂成湮墜伏請與當館修撰參序條

綱撰太祖莊宗實錄四年七月監修國史趙鳳奏奉勅

修懿祖憲祖太祖莊宗四帝實錄自今年六月一日起

手旋具進呈伏以凡關纂述務合品題承乾御宇之君

行事方云實錄追尊冊號之帝約文祇可紀年所修前

件史書今欲自莊宗一朝名爲實錄其太祖以上竝目

爲紀年甲申以前荆南行軍司馬檢校太傅高從誨起

錄從之復授檢校太傅兼侍中充荆南節度使丙戌涇州節度

使李從昶移鎮華州以冀州刺史李金全爲涇州節度

使戊子中書奏今後新及第舉人有曾授正官及御署

者欲約前任資序與除一官從之壬辰詔取來年二月

二十一日有事于南郊八月丁酉朔大理正路阮奏切

見春秋釋奠于文宣王而武成王廟久曠時祭請復常

祀從之戊戌中書奏太子少傅李琪所撰進霍彥威神

道碑文不分真偽是混功名望令改撰從之琪梁之故

相私懷感遇敘彥威在梁歷任不欲言偽梁故也辛丑

詔亂離已來天下諸軍所掠生口有主識認卽勒還之

以前清河縣令襲鄴國公食邑三千戶楊仁矩爲秘書

丞御史臺奏主簿朱穎是前中丞奏請合隨聽罷任詔

日主簿既爲正秩况入選門顯自朝恩合終考限宜令
仍舊守官甲辰以宰臣馮道爲南郊大禮使兵部尚書
盧質爲禮儀使御史中丞許光義爲儀仗使兵部侍郎
姚顛爲鹵簿使河南尹從榮爲橋道頓遞使客省使衛
尉卿張遵誨爲修裝法物使乙巳黑水朝貢使郭濟等
率屬來朝授歸德司戈放還蕃丁未以翰林學士承旨
禮部侍郎知制誥李愚爲兵部侍郎職如故以中書舍
人盧詹爲禮部侍郎以兵部侍郎裴皞爲太子賓客吐
渾首領念公山來朝貢戊申帝服袞冕御文明殿追册
昭宣光烈孝皇帝庚戌以宰臣監修國史趙鳳兼判集

賢院事以左散騎常侍任贊判大理卿事己未高麗王
王建遣使貢方物辛酉詔準往例節度使帶平章事侍
中中書令竝列銜于勅牒側書使字今錢鏐是元帥尚
父與使相名殊馬殷守太師尚書令是南省官資不合
署勅尾今後勅牒內竝落下乙卯党項首領朝貢甲子
幸金真觀改賜建法大師賜紫尼智願爲圓惠大師卽
武皇夫人陳氏也丙寅達靺來朝貢京城內有南州北
州乃張全義光啓中所築至是詔許人依街巷請射城
濠任使平填蓋造屋宇九月丁卯中書奏據宗正寺申
懿祖永興陵獻祖長寧陵太祖建極陵竝在代州鴈門

縣皇帝追尊四廟在應州金城縣詔應州升爲望州金城
城鴈門竝升爲望縣辛未太常博士段顥奏切見大祠
則差宰相行事中祠則卿監行事小祠則委太祝奉禮
竝不差官今後請差五品官行事從之癸巳制天下兵
馬元帥尚父吳越國王錢鏐可落元帥尚父吳越國王
授太師致仕責無禮也先是上將軍烏昭遇使于兩浙
以朝廷事私于吳人仍目鏐爲殿下自稱臣謁鏐行拜
蹈之禮及迴使副劉孜具述其事故停削鏐官爵令致
仕烏昭遇下御史臺尋賜自盡後有自浙中使還者言
昭遇無臣鏐之事爲孜所誣人頗以爲寃乙未詔諸道

通勘兩浙綱運進奉使竝下巡獄冬十月丙申朔併吏
部三銓爲一銓宜令本司官員同商量注擬連署申奏
仍不得于私第注官戊戌以襄州兵馬都監守磁州刺
史康福爲朔方河西等節度使靈威雄警涼等州觀察
使時朔方將吏請帥于朝廷故命康福往鎮之庚子以
右金吾上將軍史敬鎔爲左金吾上將軍以左驍衛上
將軍符彥超爲右金吾上將軍以前黔州節度使李承
約爲右驍衛上將軍以雲州節度使張敬詢爲左驍衛
上將軍以前華州節度使王景戡爲右驍衛上將軍癸
卯太常少卿蕭愿責授太子洗馬奪緋愿南郊行事與

祠官同飲詰旦猶醉不能行禮爲御史所劾也詔新授朔方節度使康福將兵萬人赴鎮已酉制復故荆南節度使高季興官爵辛亥升閩州爲保寧軍壬子以內客省使左衛大將軍李仁矩爲閩州節度使幸七星亭丙辰夏州進白鷹重誨奏曰夏州違詔進貢臣已止約帝曰善朝退帝密令左右進焉是日幸龍門十一月丁卯洛州水暴漲壞居人垣舍戊辰以刑部侍郎張文寶爲右散騎常侍己巳以尚書右丞李光序爲刑部侍郎癸酉升曹州濟陰縣爲次赤以昭宣光烈孝皇帝溫陵所在故也甲戌奉國軍節度使王延稟加兼侍中從福建

節度使王延鈞請也車駕出近郊試夏州所進白鷹戒左右勿令重誨知己卯日南至帝御文明殿受朝賀癸未祕書少監于嶠配振武長流百姓永不齒任爲宰臣趙鳳誣奏也史官張昭遠等以新修獻祖懿祖太祖紀年錄共二十卷莊宗實錄三十卷上之賜器帛有差

五代

會要監修趙鳳修撰張昭遠呂咸休各賜繒綵銀器等

十二月丁酉靈武康福奏

破野利大蟲兩族三百餘帳于方渠獲牛羊三萬戊戌詔應授官及封贈官誥舉人冬集等所費用物一切官破壬戌中書奏今後宰臣致齋內不押班不知印不赴內殿起居或遇國忌行事官已受誓戒宜不赴行香并

不奏刑殺公事大祠致齋內請不開宴每遇大忌前一日請不坐朝從之

舊五代史卷四十

舊五代史卷四十攷證

唐明宗紀六贊年五歲默念論語孝經

案宋史作贊

七歲誦書二十七卷

宜賜別勅及第附今年春榜 案宋史云特賜童子及

第附長興三年禮部春榜是書作天成四年春榜與

宋史異

二月乙巳王晏球奏此月三日收復定州 案歐陽史

作二月癸卯王晏球克定州與是書合通鑑作癸丑

攷癸丑非二月三日也疑傳寫之誤

禁鐵鑛錢 鐵鑛錢通鑑作鐵錫錢攷胡三省注云馬

殷得湖南鑄錫爲錢本用之境內其後遂流入中國
疑原本蠟字誤攷冊府元龜亦作鐵蠟錢今仍其舊
以端明殿學士趙鳳爲門下侍郎兼工部尚書平章事
案歐陽史本紀作端明殿學士尚書兵部侍郎趙
鳳爲門下侍郎兼工部尚書同平章事趙鳳傳作禮
部侍郎與本紀異見吳縝纂誤

伏以少帝今不入廟難以言宗 案舊唐書哀帝紀云
中書奏少帝行事不合稱宗攷五代會要天成二年
博士呂明龜議引君不逾年不入宗廟之禮請別立
廟于園陵故不稱景宗非議其行事有失也舊唐書

誤

丙辰權知荆南府事高從誨上章首罪 丙辰通鑑作

庚申

使副劉玫 劉玫通鑑作韓玫

徹伯爾舊作掣撥今改 托諾舊作禿餒今改 紐赫

美稜舊作捺括梅里今改 郭濟舊作骨至今改

舊五代史卷四十攷證

舊五代史卷四十一

唐書第十七

明宗紀七

長興元年春正月丙寅朔帝御明堂殿受朝賀仗衛如
常儀乙亥國子監請以監學生束脩及光學錢備監中
修葺公用從之丙子帝謂宰臣曰時雪未降如何馮道
曰陛下恭行儉德憂及烝民土合天心必有春澤是夜
降雪其夕右散騎常侍蕭希甫封狀申樞密稱得河堰
衙官狀告本都將校三十餘人欲謀不軌至旦追問無

狀斬所告人是日幸至德宮辛卯中書奏郊天有日合
差大內畱守詔以宣徽南院使朱宏昭充二月戊戌幸
稻田莊己亥黑水國主兀兒遣使貢方物翰林學士劉
昫奏新學士入院舊試五題請今後停試詩賦祇試麻
制答蕃書批答共三道仍請內賜題目定字數付本院
召試從之五代會要載劉昫原奏云舊例學士入院除
中書舍人不試餘官皆先試麻制各蕃批答
各一道詩賦各一道號曰五題並於當日呈納從前每
遇召試多預出五題潛令宿構其無黨援者卽日起草
罕能成功今請權停詩賦祇試三
道仍內賜題目兼定字數從之有司奏皇帝致齋于
明堂按舊服通天冠絳紗袍文武五品已上著袴褶近
例祇著朝服從之乙巳中書奏皇帝朝獻太微宮太廟

祭天地于圜丘準禮例親王爲亞獻行事受誓戒從之
以天雄軍節度使石敬瑭爲御營使壬子帝宿齋于明
堂殿癸丑朝獻太微宮是日宿齋于太廟詰旦請行饗
禮甲寅赴南郊齋宮是夜微雨三鼓後晴明如晝乙卯
祀昊天上帝于圜丘柴燎禮畢郊宮受賀是日御五鳳
樓宣制改天成五年爲長興元年大赦天下除十惡五
逆放火劫舍屠牛官典犯贓僞行印信合造毒藥外罪
無輕重咸赦除之天成四年終諸道所欠殘稅及場院
欠折並特放免羣臣職位帶平章事侍中中書令並與
改鄉名里號朝臣及蕃侯郡守亡父母及父母在并妻

室未沾恩命者並與恩澤應私債出利已經倍者祇許徵本已經兩倍者本利並放河陽管內人戶每畝舊徵橋道錢五文今後不徵諸道州府每畝先徵麴錢五文今特放一文云商州吏民以刺史郭知瓊善政聞詔褒之三月丁卯幸會節園遂幸河南府靈武奏殺戮蕃賊二千人壬申鳳翔節度使李從曠進封岐國公移鎮汴州甲戌延州節度使高允韜移鎮邢州丙子以宣徽使朱宏昭爲鳳翔節度使潞州節度使朱漢賓加檢校太傅移鎮晉州徐州節度使房知溫移鎮鄆州鄆州節度使王晏球移鎮青州宰臣馮道率百寮拜表請上尊號

曰聖明神武文德恭孝皇帝詔報不允壬午許州節度使孔循移鎮滄州陝州節度使張延朗移鎮許州加檢校太傅滄州節度使張虔釗移鎮徐州加檢校太保癸未詔貶右散騎常侍集賢殿學士判院事蕭希甫爲嵐州司戶參軍仍馳驛發遣坐誣告之罪也宰臣馮道等再請上尊號詔允之丙戌以侍衛親軍馬步軍都指揮使河陽節度使康義誠爲襄州節度使檢校太傅以左武衛上將軍劉彥琮爲陝州節度使檢校太保庚寅制淑妃曹氏可立爲皇后仍令擇日冊命夏四月甲午朔國子司業張溥奏請復八館以廣生徒按六典監有六

學國子太學四門律學書學算學是也而溥云八館謬
矣丁酉前汴州節度使檢校太尉兼侍中符習加太子
太師致仕進封衛國公戊戌遂州節度使夏魯奇加同
平章事皇子河中節度使從珂進位檢校太尉封開國
公自是諸道節鎮皆次第加恩以郊禋覃慶澤故也已
亥幸會節園壬寅以樞密使安重誨爲留守太尉兼中
書令使如故青州節度使王建立加侍中移鎮潞州皇
子河中節度使從珂奏臣今月五日閱馬于黃龍莊衙
內指揮使楊彥溫據城叛臣尋時詰問稱奉宣命胡三省通鑑注云樞密院用宣三省用堂帖臣見在虞鄉縣帝遣西京留守索自

通侍衛步軍都指揮使藥彥稠等攻之仍授彥溫絳州
刺史冀誘而擒之也詔從珂赴闕丁未以戶部尚書李
璘爲兗州行軍司馬坐引淮南覘人貽安重誨寶帶也
戊申宰臣馮道加右僕射趙鳳加吏部尚書乙酉以左
龍武統軍劉君鐸卒廢朝癸丑索自通藥彥稠等奏收
復河中斬楊彥溫傳首來獻初彥稠出師帝戒之曰與
朕生致彥溫吾將自訊之及收城斬首傳送帝怒彥稠
等時議皆以爲安重誨方弄國權從榮諸王敬事不暇
獨忌從珂威名每于帝前屢言其短巧作窺圖冀能傾
陷彥溫旣誅從珂歸清化里第重誨謂馮道等曰蒲帥

失守責帥之義法當如何翼日道等奏合行朝典帝不
悅趙鳳堅奏故事有責帥之義所以激勵藩守帝曰皆
非公等意也後數日帝于中興殿見宰臣趙鳳承重誨
意又再論列帝默然翼日重誨復自論奏帝極言以拒
之語在末帝紀中帝又曰卿欲如何制置重誨曰于陛
下父子之間臣不合言一稟聖旨帝曰從他私第間坐
何煩奏也乃止以前邢州節度使檢校司徒李從溫爲
左武衛上將軍丙辰以西京畱守檢校司徒索自通爲
河中節度使丁巳雲州奏掩襲契丹獲頭口萬計戊午
帝御文明殿受冊徽號冊曰維長興元年歲次庚寅四

月甲午朔二十五日戊午金紫光祿大夫守尚書左僕
射兼門下侍郎同中書門下平章事充太微宮使宏文
館大學士上柱國始平郡開國侯食邑一千五百戶食
實封一百戶臣馮道銀青光祿大夫門下侍郎兼吏部
尚書同中書門下平章事監修國史判集賢院事上柱
國天水郡開國伯食邑七百戶臣趙鳳及文武百官特
進太子少傅上柱國酒泉郡開國侯食邑一千戶臣李
琪等五千八百九十七人言臣聞天不稱高而體尊地
不矜厚而形大厚無不載高無不覆四時行乎內萬物
生其間總神祇之靈叶帝王之運日出而星辰自戢龍

飛而雷雨皆行元氣和而天下和庶事正而天下正伏
惟皇帝陛下天授一德時歷多艱翊太祖以興邦佐先
皇而定難拯嗣昭于潞困救德威于燕危遏思遠而全
鄴都誅彥章而下梁苑成再造之業由四征之功洎纂
鴻圖每敷皇化去內庫而省庖膳出宮人而減伶官輕
寶玉之珍卻鷹鷂之貢淳風旣洽嘉瑞自臻故登極之
前人皆不足改元之後時便有年遐荒旋斃于戎王重
譯往來于蠻子東巡而守殷墟北討而王都殲破契丹
而燕趙無虞控靈武而瓜沙並復近以饗上元而薦太
廟就吉土而配昊天輅已降而雨霑事欲行而月見燔

柴禮畢作解恩覃帝命咸均人情普悅非陛下有道有
德至聖至明動不疑人靜惟恭已常敦孝禮每納忠言
則何以臨御五年澄清四海時久纏于災害民驟見于
和平休徵備載于簡編徽號過持于謙讓三年不允衆
志皆堅天不以上帝自崇日不以大明自貴于烝民有
惠于元后同符列聖皆然舊章斯在今以明庭百辟列
土諸侯中外同辭再三瀝懇臣等不勝大願謹奉玉寶
玉冊上號曰聖明神武文德恭孝皇帝伏惟皇帝陛下
體堯舜之至道法日月于太虛威于夷狄恩及蟲魚奉
國者繼加榮寵違天者咸就誅鋤典禮當告成之後夙

夜思卽位之初千秋萬歲永混車書宰臣馮道之辭也
庚申以左金吾上將軍史敬鎔爲鄧州節度使以右金
吾上將軍符彥超爲兗州節度使以驍衛上將軍張敬
詢爲滑州節度使以閬州防禦使孫岳爲鳳州節度使
詔改鳳翔管內應州爲匡州信州爲晏州改新州管內
武州爲毅州五月乙丑鄭州防禦使張進副使咸繼威
並停任以盜掠城中居人故也丙寅以少府監韋肅爲
洛州刺史以潞州節度使王建立爲太傅致仕建立素
與安重誨不協因其入朝乃言建立自鎮歸朝過鄴都
日有扇搖之言以是罪之故令致仕丁卯以前興元節

度使劉仲殷權知潞州軍州事戊辰以安州節度使高
行珪卒輟朝有司上言皇后受冊內外命婦並合奉賀
今未有命婦準例上表稱賀中書諸道節度使但進表
上言皇帝外命婦上皇后賀賤表進呈訖無報應皇親
或有慶賀及起居章表內中進呈後祇宣示來使並不
合答復從之壬申以權知昭義軍軍州事劉仲殷爲潞
州節度使檢校太傅丁丑帝臨軒命使冊淑妃曹氏爲
皇后禮院上言百官上疏于皇后曰皇后殿下及六宮
及率土婦人慶賀祇呼殿下不言皇后中書覆奏若祇
呼殿下恐與皇太子無所分別凡上中宮表章呼皇后

殿下若不形文字尋常祇呼皇后從之癸未太子少傅蕭頊卒廢朝甲申回鶻可汗仁喻遣使貢方物辛卯以翰林承旨兵部侍郎李愚爲太常卿壬辰以前滑州節度使李從璋爲右驍衛上將軍六月丁酉以護駕馬軍都指揮使貴州刺史安從進爲宣州節度使充護駕馬軍都指揮使以護駕步軍都指揮使澄州刺史藥彥稠爲壽州節度使兼護駕步軍都指揮使甲辰以皇城使安崇緒爲河陽畱後重誨子也鳳翔奏所管良晏匡三州並無屬縣請郤改爲縣從之仍舊爲軍鎮前振武節度使安金全卒壬子中書門下奏詳覆到禮部送今年

及第進士李飛樊吉夏侯琪吳湘王德柔李穀等六人望放及第其盧價等七人及賓貢鄭朴望許令將來就試知貢舉張文寶試士不得精當望罰一季俸從之丁巳皇子北京畱守河東節度使從厚移領鎮州以左武衛上將軍李從溫爲許州節度使秋七月甲子以宣徽南院使行右衛上將軍判三司馮贇爲北京畱守太原尹已巳以鄧州節度使史敬鎔卒廢朝甲戌以左威衛上將軍梁漢颺爲鄧州節度使前兗州節度使趙在禮爲左驍衛上將軍庚辰奉國軍節度使兼威武軍節度副使檢校太尉兼侍中王延稟加兼中書令詔諸州得

替防禦團練使刺史並宜于班行比擬如未有員闕可
隨常參官逐日立班新例也辛巳詔揀年少宮人及西
川宮人並還其家無家可歸者任從所適甲申以前齊
州防禦使孫璋爲鄜州節度使戊子以右散騎常侍陸
崇卒廢朝崇爲福建冊使卒于明州贈兵部尚書宿州
進白兔安重誨謂其使日豐年爲上瑞兔懷狡性雖白
何爲命退歸八月甲午以前鄧州節度使盧文進爲左
衛上將軍北京奏吐渾千餘帳內附于天池川安置禁
在京百司影射州縣稅戶乙未捧聖軍使李行德十將
張儉告密人邊彥溫並族誅以其誣告安重誨私市兵

仗故也以前許州節度使張延朗爲檢校太傅行兵部
尚書充三司使三司之有使額自延朗始也初中書覆
奏授延朗諸道鹽鐵轉運等使兼判戶部度支事奏入
宣旨曰會計之司國朝重事將總成其事額俾專委于
近臣貴便一時何循往例兼移內職可示親規張延朗
可充三司使班在宣徽使下癸卯北京奏生吐渾內附
欲于嵐州安族帳都官員外郎知制誥張昭遠奏請依
國朝舊例選郎官御史分行天下宣問風俗興利除害
不報壬寅皇子河南尹判六軍諸衛事從榮封秦王仍
令所司擇日冊命五代會要長興元年九月太常禮院
奏草定秦王儀注博士段顯議曰據

開元禮臨軒冊命諸王大臣其日受冊者朝服從第
鹵簿與百官俱集朝堂就次受冊訖通事舍人引不載
謁朝還第之儀自元以後冊拜諸王皆正衙命使詣
延英進冊皇帝御內殿高品引王入立于位高品宣制
讀冊王受冊訖歸院亦無乘輅謁朝之禮臣按五禮精
義云古者皆因禘嘗而頒爵祿所以示無自專稟之于
祖宗也今雖冊命不在蒸嘗然拜大官封大邑必至殿
廷敬慎之道也今當司欲準開元禮其日秦王服朝服
自理所乘輅車備鹵簿與羣臣俱集朝堂就次受冊訖
至應天門外奉冊置于載冊之車秦王升輅出謁太廟
訖歸理所儀仗鹵簿戊申兗州奏淮南海州都指揮使
如來時之儀從之

王傳拯殺本州刺史陳宣焚燒州城以所部兵士及家
口五千人歸國至沂州帝遣使慰納之庚戌正衙命使
冊福慶長公主孟氏以前雄武軍節度使王思同為左
武衛上將軍以前鳳州節度使陳臯為右威衛上將軍

壬子正衙命使赴太原冊永寧公主石氏乙卯以左監
門衛上將軍陳延福卒廢朝丙辰皇子鎮州節度使從
厚封宋王仍令擇日冊命九月乙丑階州刺史王宏贊
上言一州主客戶纔及千戶並無縣局臣今檢括得新
舊主客已及三千二百欲依舊額立將利福津二縣請
置令佐從之丁丑詔天下諸州府不得奏薦著紫衣官
員為州縣官戊寅升尚書右丞為正四品癸未利闔遂
三州奏東川節度使董璋謀叛結連西川孟知祥甲申
以鎮州節度使范延光為檢校太傅守刑部尚書充樞
密使利州閬州進納東川檄書言將兵擊利闔責以間

謀朝廷爲名乙酉以左驍衛上將軍趙在禮爲同州節度使兼四面行營馬步軍都指揮使樞密院直學士守工部侍郎閻至樞密院直學士守尚書右丞史圭並轉戶部侍郎依前充職以翰林學士守戶部侍郎李懌爲尚書右丞以翰林學士戶部侍郎劉昫爲兵部侍郎以翰林學士中書舍人竇夢徵爲工部侍郎依前充職以中書舍人劉贊爲御史中丞以御史中丞許光義爲兵部侍郎以兵部侍郎姚顛爲吏部侍郎丙戌詔東川節度使董璋可削奪在身官爵仍徵兵進討丁亥以西川節度使孟知祥兼西南面供饋使天雄軍節度使石敬

瑋兼東川行營都招討使以遂州節度使夏魯奇兼東川行營招討副使庚寅以右衛上將軍王思同爲京兆尹充西京留守兼西南行營馬步都虞候冬十月壬辰以太子少傅李琪卒廢朝癸巳以鄜州節度使米君立卒廢朝詔凡賻贈布帛言段不言端匹段者二丈也宜令三司依此給付甲午正衙命使冊興平公主于宋州節度使駙馬都尉趙延壽之私第己亥以左驍衛上將軍李從璋爲陝州節度使陝州節度使劉彥琮移鎮邠州尚書博士田敏請依舊典藏冰頒冰以銷陰陽愆伏之診詔從之

五代會要載原勅云藏冰之制載在前經獻廟之儀廢于近代旣朝臣之特舉案典

禮以宜行田敏所奏祭司寒獻羔事宜依其桃弧棘乙
矢事久不行理難備創其諸侯亦宜準往制藏冰
已供奉官張仁暉自利州迴奏董璋攻陷閬州節度使
李仁矩舉家遇害丁未宮苑使董光業并妻子並斬于
都市璋之子也辛亥以武安軍節度副使洪鄂道行營
副都統檢校太尉馬希聲爲武安軍節度使加兼侍中
時湖南馬殷奏久病不任軍政乞以男希聲爲帥故有
是命中書奏吏部流內銓諸色選人所試判兩節度欲
委定其等第文優者超一資其次者次資又次者以同
類道理全疎者于同類中少人戶處注擬從之十一月
庚申朔帝御文明殿冊皇子秦王仗衛樂懸如儀甲子

正衙命使冊皇子宋王子鎮州是日幸龍門翼日馮
奏曰陛下宮中無事遊幸近郊則可矣若涉歷山險
一馬足蹉跌則貽臣下之憂臣聞千金之子坐不垂堂
百金之子立不倚衡况貴爲天子豈可自輕哉帝斂容
謝之退令小黃門至中書問道垂堂倚衡之義道因注
解以聞帝深納之己巳故太子少保致仕封舜卿贈太
子少傅庚午應州節度使張敬達移雲州以捧聖都指
揮使守恩州刺史沙彥詢爲應州節度使以潁州團練
使高行周爲安北都護充振武節度使壬申黔南節度
使楊漢章奔城忠州爲董璋所攻也乙亥制西川節

度使孟知祥削奪官爵以其同董璋叛也丙子以前同
州節度使羅周敬爲左監門上將軍丁丑故兵部侍郎
許光義加贈禮部尚書辛巳西面軍前奏今月十三日
階州刺史王宏贄瀘州刺史馮暉自利州取山路出劍
門關外倒下殺敗董璋守關兵士三千餘人收復劍州
甲申日南至帝御文明殿受朝賀丙戌以給事中鄭韜
光爲左散騎常侍青州奏得登州狀契丹安巴堅男東
丹王托雲越海來歸國契丹國志時東丹王失職怨望
因率其部四十餘人越海歸唐
十二月乙未荆南奏湖南節度使楚國王馬殷薨廢朝
三日庚子以前襄州節度使安元信爲宋州節度使辛

丑幸苑中丁未以二王後祕書丞襲鄴國公楊仁矩卒
輟朝贈工部郎中庚戌湖南節度使馬希聲起復加兼
中書令壬子以樞密院直學士戶部侍郎閻至爲澤州
刺史樞密院直學士戶部侍郎史圭爲貝州刺史甲寅
遣樞密使安重誨赴西面軍前時帝以蜀路險阻進兵
艱難潼關已西物價甚賤百姓輓運至利州率一斛不
得一斗謂侍臣曰關西勞擾未有成功誰能辦吾事者
朕須自行安重誨曰此臣之責也臣請行帝許之言訖
而辭翼日遂行甲寅故西川兵馬都監泗州防禦使李
嚴贈太傅丙辰車駕畋于西山臘也丁巳回鶻遣使來

朝貢戊午故荆南節度使檢校太尉兼尚書令南平王
高季興贈太尉

舊五代史卷四十一

舊五代史卷四十一攷證

唐明宗紀七癸丑索自通藥彥稠等奏收復河中 案

通鑑作辛亥索自通拔河中斬楊彥溫癸丑傳首來
獻歐陽史亦作辛亥自通執彥溫殺之較是書爲詳

審

張延朗可充三司使班在宣徽使下 案宋史職官志

三司使在宣徽使後蓋仍後唐之制

淮南海州都指揮使王傳拯 王傳拯歐陽史作傳極

攷是書列傳及通鑑並作傳拯疑歐陽史傳刻之訛

乙巳供奉官張仁暉自利州迴奏董璋攻陷閬州 案

董璋陷閬州通鑑作九月庚辰歐陽史作十月乙巳
蓋以奏聞之日爲據也

辛巳西面軍前奏今月十三日階州刺史王宏贄瀘州
刺史馮暉自利州取山路出劍門關外倒下殺敗董
璋守關兵士三千人收復劍州 案通鑑攷異引唐
實錄作今月十三日大軍進攻入劍門次十七日收
下劍州是書統繫于十三日疑有舛誤
安巴堅舊作阿保機今改 托雲舊作突欲今改

舊五代史卷四十一攷證

舊五代史卷四十二

宋門下侍郎參知政事監修國史薛居正等撰

唐書第十八

明宗紀八

長興二年春正月庚申朔帝御明堂殿受朝賀仗衛如
儀乙丑詔曰故天策上將軍守太師尚書令楚國王馬
殷品位俱高封崇已極無官可贈宜賜諡及神道碑文
仍以王禮葬壬申契丹東丹王托雲自渤海國率其衆
到闕帝慰勞久之錫賚加等是日百寮稱賀丙子以沙
州節度使曹義金兼中書令丁丑東丹王托雲進本國

印三紐庚辰以靜江軍節度使馬賓卒廢朝追贈尚書令丙戌荆南節度使高從誨落起復加兼中書令二月己丑朔以宋州節度使趙延壽爲左武衛上將軍充宣徽北院使癸巳詔貢院舊以例夜試進士今後晝試排門齊入卽日試畢丁酉幸至德宮又幸安元信東丹王托雲之第辛丑以鴻臚卿致仕賈馥卒廢朝以樞密院使守太尉兼中書令安重誨爲檢校太師兼中書令充河中節度使進封沂國公己酉以右威衛上將軍陳臯爲洋州節度使詔諸府少尹上任以二十五日爲限諸州刺史諸道行軍司馬副使兩使判官已下賓職團防

軍事判官推官府縣官等並以三十日爲限凡幕職隨府者不在此例癸丑邠州節度使李敬周移鎮徐州詔禁天下不得開發無主墳墓三月辛酉詔渤海國人皇王托雲宜賜姓東丹名慕華仍授檢校太保安東都護充懷化軍節度瑞鎮等州觀察等使其從慕華歸國部校各授懷化歸德將軍中郎將先于定州擒獲蕃將特哩衮宜賜姓狄名懷惠扎古宜賜姓列名知恩並授檢校右散騎常侍錫里扎拉宜賜姓原名知感裕勒古宜賜姓服名懷造奚王副使格斯齊宜賜姓乙名懷宥三人並授檢校太子賓客甲子以前鴻臚卿王瓊爲太僕

卿丙寅以皇子從珂爲左衛大將軍從珂自河中失守歸清化里第至是安重誨出鎮河中帝召見泣而謂之曰如重誨意爾安得更相見耶因有是命壬申以滄州節度使孔循卒廢朝乙亥以西京畱守權知興元軍府事王思同爲山南西道節度使充西面行營馬步軍都虞候庚辰以少府監聶延祚爲殿中監以前雲州節度使楊漢章爲安州節度使乙酉太師致仕錢鏐復授天下兵馬都元帥尚父吳越國王以其子兩浙節度使元瓘等上表首罪故有是命丁亥以太常卿李愚爲中書侍郎平章事集賢殿大學士夏四月辛卯制德妃王氏

進位淑妃詔錢鏐依舊賜不名誅內官安希倫以其受安重誨密指令于內中伺帝起居故也丁酉幸會節園宴羣臣因幸河南府詔罷州縣官到任後率斂爲地圖又禁人毀廢所在碑碣恐名賢遺行失所考也戊戌詔今年四月禘饗太廟故昭義節度使李嗣昭故幽州節度使周德威故汴州節度使符存審並配饗莊宗廟庭己亥以前徐州節度使張虔釗爲鳳翔節度使癸卯以汴州節度副使藥縱之爲戶部侍郎前宗正卿李諧爲將作監甲辰以宣徽北院使左衛上將軍趙延壽爲檢校太傅行禮部尚書充樞密使乙巳潞州節度使劉仲

殷移鎮秦州帝幸龍門佛寺祈雨己酉天雄軍節度使石敬瑭兼六軍諸衛副使辛亥以前鳳翔節度使朱宏昭爲左武衛上將軍充宣徽南院使壬子以兵部尚書盧質爲河陽節度使甲寅以遂州節度使夏魯奇沒于王事廢朝詔曰久憊時雨深疚予心宜委諸州府長吏親問刑獄省察寃濫見禁囚徒除死罪外並放五月戊午朔帝御文明殿受朝庚申以三司使行工部尚書張延朗爲兗州節度使辛酉詔近聞百執事等或親居內職或貴列廷臣或宣達君恩或勾當公事經由列鎮干撓諸侯指射職員安排親昵或潛示意旨或顯發書題

自今後一切止絕有所犯者發薦人貶官求薦人流配如逐處長吏自徇人情只仰被替人詣闕上訴長吏罰兩月俸發薦人更加一等被替人却令依舊甲子都官郎中知制誥崔稅上言請搜訪宣宗已來野史以備編修從之丁卯詔諸州府城郭內依舊禁麴其麴官中自造減舊價之半貨賣應田畝上所徵麴錢並放鄉村人戶一任私造時甚便之戊辰中書奏應朝臣丁憂者望加頒賚從之丁丑以祕書監劉岳爲太常卿己卯以武德使孟漢瓊爲右衛大將軍知內侍省充宣徽北院使辛巳以前相州刺史孟鵠爲左驍衛大將軍充三司使

甲申以權知朗州軍州事守永州刺史馬希範爲洪州節度使檢校太傅以權知桂州軍府事富州刺史馬希彝爲鄂州節度使檢校司徒乙酉以左金吾大將軍薄文爲晉州畱後鴻臚卿柳膺將齋郎文書賣與同姓人柳居則伏罪大理寺斷當大辟緣經赦減死追奪見任官終身不齒詔應見任前資守選官等所有本朝及梁朝出身歷任告身並仰送納委所在磨勘換給公憑只以中興已來官告及近受文書敘理其諸色蔭補子孫如非虛假不計庶嫡並宜敘錄如實無子孫別立人繼嗣已補得身名者只許敘蔭一人其不合敘使文書限

百日內焚毀須絕此後更敢將合焚文書參選求仕其所犯之人並傳者並當極法應合得資蔭出身人並須依格依令施行閏月庚寅制河中節度使檢校太師兼中書令安重誨可太子太師致仕是日重誨男崇緒等潛歸河中以右散騎常侍張文寶爲兵部侍郎夔州節度使安崇阮棄城歸闕待罪于閣門詔釋之時董璋寇峽內諸州崇阮望風遁走壬辰陝州節度使李從璋移鎮河中癸丑升盧州爲昭順軍甲午以衡州刺史姚彥章爲昭順軍節度使丁酉安重誨奏男崇贊崇緒等到州臣已拘送赴闕崇緒至陝州詔令下獄己亥詔安重

誨宜削奪在身官爵並妻阿張男崇贊崇緒等並賜死其餘親不問壬寅以尚書左丞崔居儉爲工部尚書以吏部侍郎王權爲尚書左丞丙午以隨駕馬軍都指揮使宣州節度使安從進爲陝州節度使丁未以前中書舍人楊凝式爲左散騎常侍戊申以右龍武統軍王景戡爲新州節度使己酉以右領軍上將軍李肅爲左金吾大將軍壬子以隨駕步軍都指揮使藥彥稠爲邠州節度使癸丑以邠州節度使劉行琮卒廢朝贈太傅詔有司及天下州縣于律令格式六典中錄本局公事書于廳壁令其遵行六月丁巳朔復置明法科同開元禮

乙丑以皇子左衛大將軍從珂依前檢校太傅加同平章事行京兆尹充西都畱守庚午以邠州節度使張溫爲右龍武統軍甲戌以魏徵八代孫韶爲安定縣主簿乙亥以鎮州節度使宋王從厚爲興唐尹以石敬瑭爲河陽天雄軍節度使以天雄軍節度使石敬瑭爲河陽節度使依前六軍諸衛副使丙子詔諸道觀察使均補苗稅將有力人戶出剩田苗補貧下不迨頃畝有嗣者并改檢括自今年起爲定額乙卯定州節度使李從敏移鎮州節度使盧質爲滄州節度使庚辰皇孫太子舍人重美授司勳員外郎重真已下六人並授同正將軍

及檢校官壬午以前秦州節度使李德琬爲定州節度使兼北面行營副招討使太原地震詔天下州府斷獄先于案牘之上坐所該律令格式及新勅然後區分乙酉以前黔州節度使楊漢賓爲羽林統軍詔止絕諸射係省店宅莊園秋七月庚寅以權侍衛馬軍都指揮使登州刺史張從實爲壽州節度使兼侍衛步軍都指揮使壬辰福建王延鈞上言當境廟七所乞封王號勅如諸史傳有名宜封爲閩越富義王其餘任自于境內祭享乙未詔諸道奏薦州縣官使相先許一年薦三人今許薦五人不得使相先許薦二人今許薦三人直屬京

防禦團練使先許薦一人今許薦二人詔應州縣官內有曾在朝行及曾佐幕府罷任後準前資朝官賓從別處分其帶省銜并內供奉裏行及諸已出選門者或降授令錄罷任日並依出選門例處分便與除官更不在赴常調州縣官其間書得十六考者準格敘加朝散階亦準出選門例處分三司奏先許百姓造麴不來官場收買伏恐課額不逮請復已前麴法鄉戶與在城條法一例指揮仍據已造到麴納官量支還麥本從之甲辰前晉州節度使朱漢賓授太子少保致仕庚戌大理正劇可久責授登州司戶刑部員外郎裴選責授衛尉寺

通鑑四十五卷附錄
卷之四十三
承刑部侍郎李光序判大理卿事任贊各降一官罰一
季俸坐斷罪失入也八月丙寅詔天下州府商稅務並
委逐處差人依省司年額勾當納官以故鎮州節度使
趙王王鎔男昭誨爲朝議大夫司農少卿賜紫金魚袋
繼絕也辛丑升虔州爲昭信軍癸亥以太常少卿盧文
紀爲秘書監以秘書監馬縞爲太子賓客左監門上將
軍羅周敬爲右領軍上將軍前懷州刺史婁繼英爲左
監門上將軍乙丑詔大理寺官員宜同臺省官例升進
法直官比禮直官任使仍于諸道贓罰錢內每月支錢
一百貫文賜刑部大理兩司其刑部于所賜錢三分與

一分丙寅以武平軍節度使馬希振依前檢校太尉兼
侍中充虔州昭信軍節度使詔百官職吏應選授外官
者考滿日並委本州申奏追還本司依舊職行公事已
巳太傅致仕王建立太子少保致仕朱漢賓皆上章求
歸鄉里詔內外致仕官凡要出入不在拘束之限辛未
以翰林學士兵部侍郎劉昫守本官充端明殿學士以
左拾遺直樞密院李崧充樞密直學士壬申以左龍武
統軍李承約爲潞州節度使癸酉詔文武百官五日內
殿起居仍舊其輪次轉對若有封事許非時上表朔望
入閣待制候對一依舊制乙亥翰林學士工部侍郎竇

夢徵卒丁丑以前西京副留守梁文矩爲兵部尚書己卯詔不得薦銀青階爲州縣官壬午詔應有朝臣藩侯郡守凡欲營葬未曾封贈許追封贈禮部尚書致仕李德休卒九月丙戌以前兗州節度使符彥超爲左龍武統軍己亥懷化軍節度使東丹慕華賜姓李名贊華改封隴西縣開國公應有先配諸軍契丹並賜姓名詔天下營田務只許耕無主荒田各招浮客不得畱占屬縣編戶辛丑樞密使檢校太傅刑部尚書范延光加同平章事使如故壬寅以中書舍人封翹爲禮部侍郎禮部侍郎盧澹爲戶部侍郎癸卯許州節度使李從溫移鎮

河東詔天下州縣官不得與部內富民于公廳同坐辛亥詔五坊見在鷹隼之類並可就山林解放今後不許進獻冬十月戊午以前北京畱守太原尹馮贇爲許州節度使辛酉左補闕李詳上疏以北京地震多日請遣使臣往彼慰撫察問疾苦祭祀山川從之先是太原畱後密奏無敢言者及詳有是奏帝甚嘉之改賜章服丙寅詔應在朝臣寮藩侯郡守準例合得追贈者新授命後便于所司投狀旋與施行封妻蔭子準格合得者亦與施行外官曾任朝班據在朝品秩格例合得封贈敘封者並與施行其補蔭據資蔭合得者先受官者先與

收補後受官者據月日次第施行從之十一月甲申朔日有食之己丑日南至帝御文明殿受賀丁酉以翰林學士起居郎張礪爲兵部員外郎知制誥充職以汝州防禦使張希崇爲靈州兩使留後庚子以左威衛上將軍華溫琪爲華州節度使福建節度使王延鈞奏誅建州節度使王延稟及其子繼雄壬寅詔今後諸道兩使判官罷任一年與比擬書記支使防禦團練判官二年推巡軍事判官並三年後與比擬仍每遇除授量與改轉官資或階勳職次云以御史中丞劉贊爲刑部侍郎以鳳州節度使孫岳充西面閣道使壬子鄆州奏黃河

暴漲漂溺四千餘戶癸丑以給事中崔衍爲御史中丞十二月甲寅朔詔開鐵禁許百姓自鑄農器什器之屬于夏秋田畝上每畝輸農器錢一錢五分乙卯畋于西郊丁巳以彰武軍節度使劉訓卒廢朝庚午以前利州節度使康思立爲陝州節度使秦州地震丁丑詔三司所過西川兵士家屬常令贍給

舊五代史卷四十二

舊五代史卷四十二攷證

唐明宗紀八壬申契丹東丹王托雲自渤海國率其衆到闕 案托雲歸唐五代春秋作二年正月蓋以到闕之日為據歐陽史作四年十一月丙戌蓋以奏聞之日為據

以沙州節度使曹義金兼中書令 沙州原本作汝州 今據通鑑改正

甲寅以遂州節度使夏魯奇沒于王事廢朝 案通鑑正月庚午李仁罕陷遂州夏魯奇自殺歐陽史作四月甲寅董璋陷遂州武信軍節度使夏魯奇死之蓋

歐陽史以奏聞之日為陷城之月也

見禁囚徒除死罪外並放案歐陽史作乙卯以旱赦

流罪以下囚與是書作壬子異

詔安重誨宜削奪在身官爵並妻阿張男崇贊崇緒等

並賜死案重誨見殺是書作閏月己亥歐陽史作

閏五月丁酉五代春秋作五月

以前黔州節度使楊漢賓為羽林統軍漢賓原本作

漢章攷上文有雲州節度使楊漢章不應黔州節度

使與之同名今據通鑑改正

辛亥詔五坊見在鷹隼之類並可就山林解放辛亥

歐陽史作了亥通鑑從是書

扎雲舊作突欲今改特哩衮舊作惕隱今改扎古

舊作則骨今改錫里扎拉舊作舍利則刺今改

裕勒古舊作械骨今改格斯齊舊作竭失訖今改

新編五代史卷四十二

舊五代史卷四十二

五十四

三

舊五代史卷四十二以證

符

符

符

符

符

符



